


MÈÈSÀ À MUKALENGE

 . . . pa muminu wànyì bifùmìne ku masangisha àbùngì, dikùmi ne àtaanu, mu Arizona. Bapicìle mu cikondo cilenga cyà dikèma. Mukalenge Yesù mmutùbènèshe ànu byà menemene, byà biyiila ne panshi. Mbateetè kukwàta mudimu kakesè ne mùshindù wà dyenza wà Mukalenge, ndi mutwìshìibwe ne, ncifwànyine kwikala mùshindù mujaalàme wà dicyàmba, kubwelamù ne kwanji kuteemesha mwaba awu, dyàmbedi. Mèmè kubwelamù matùkù mulongologo kumpàla, kwenza masangisha dikùmi anyì dikùmi ne àbidì ku èkèleeziyà yà minène yònsò mu Phoenix mujimà, mu Sunnyslope ne mu Tempe ne mu Mesa ne kwònsò aku, ne mu mùshindù kampànda kuteemesha mu nyungulukilu mwònsò amu ne pashiishe kuciludikila cyònsò ku malòòlò àtaanu a mpungilu awu. Nènku civwa mmpungilu wa mutàmbe bunène utùdiku benzè mu Àmèrikè wa ku Nord. Úvwa nngwa munène. Didyà dyà dindà dyà ditàmbe bunène, ne—ne kàbidì didyà dyà—dyà mikùùkùku dilòòlò adi.

² Ncyèna ànu mwà kwamba ne bàakapetà Nyumà Mwímpè bàvwa bùngì kaayi to. Bìvwa—bìvwa bilenga byà dikèma bwà bùngì bwà bàakapetà Nyumà Mwímpè, ne bùngì bwà bàakondopiibwà ne—ne bàakasùngidiibwà, bìdì—bìdì ànu bilenga byà dikèma. Pa nànkù tudi ne kusàkidila kùdì Nzambi patùdì tumòna cikondo cyènda cìya apa. Bantu banènè bààbùngì bààkabwela. Umwe wa ku . . .

³ Eci necyènzèlè Mwanèètù Neville bìmpè bikolè. Mèmè kumòna mwambi kampànda wa ba-Presbytériens, wa mu Cilongelu cyà citàmbe bunènè cyà ba-Presbytériens cyà mu . . . cyà mu ditùnga edi, ùja maja mu Nyumà. Kaa, ekèlekèle, civwa bulelèlèlà cintu kampànda, kupetayè Nyumà Mwímpè. Ki dìbà adi kungambilayè, wàmba ne: “Ndi mupetè wùmwe wà ku mikàbà yèbè yà méyi.” Yèyè ne: “Kawùvwa mwímpè menemene to.” Yèyè ne: “Wùvwa ànu wùzakalala, kàdi,” yèyè ne, “mèmè kuya naawù buludì mu cilongelu citùmbùke amu ne kuwèla.” Ki yèyè ne . . . Bu mùvwàye muntu munène wa dilonga dyà nsòmbelu muntwamu, yèyè wàkabàlama bònsò mu cinyàànyà. “Èè, bàCitéèlejìkù musangu nànsha wùmwe, nànsha byà munyi,” mwàkambayè. Ki kwambayè ne ùvwa . . .

⁴ Ki yèyè ne wàkadìtwa mu dija dyà mu Nyumà mu èkèleeziyà wendè, paanyimà pàà yèyè mumanè kupeta Nyumà Mwímpè, nènku bòbò kwamba ne: “Révérend, neuyiilè mwà kutwà dikàsà dipyadìpyà dìbà kaayi?”

⁵ Yèyè ne: “Pànji disangisha dyànyì kuyiila edi nùnkù.” Ngeela meeji ne aci civwakù cilenga cilayà, nudi bamanyè’s,

mulombodi wà ba-Presbytériens's, èyowà, wàmba ne: “Pànji disangisha dyànyi kuyiila edi nunku.” Pa nanku aci's ncintu cimpè. Ànu mùdi mwànà mukesè wa mu dibòko, ànu wa mupyamùpyà's kàdi pèndè's ùkaadi. . . Èè, s'nudi bamanyè cidì cifwànyine kukèngela bwà kwikalayè, bwà kwikala mulongeshi wa dilonga dyà nsòmbelu mu Cìlongelu citàmbe kutùmbuka cyà ba-Presbytériens cyà mu Boston, èè, mmu Ètats-Unis.

⁶ Mémè kumòna umwe wa ku bangàngàbuka bapandi bàà myoyi bakùlù bàà ba-Mayos ùyiisha Èvànjeeliyò mu Nyumà ne wàkula mu myakulu. Kaa, ekèlekèle! Mémè kumòna ngàngàbukà mukwàbò mupilùke, uvwa Adventiste du Septième jour, wa mu. . . Úvwa kàbìdì ngàngàbukà mu—mu—mupilùke wa myoyi ne mabòdi kàbìdì, nènku yèyè, muntu mukùlákàji, kupetayè dibàtiiza dyà Nyumà Mwímpè. KuMupetayè. Dilòòlò kampànda mémè kumutentekela byanza mu mbàlandà, ne kupetayè Nyumà Mwímpè. Pa nanku tudi. . . bintu búngì cyanàànà bìdì Mukalenge wetù mwenzè bitùdì naabì ne kusàkidila, ne nangàngà pa kumòna cikondo eci.

⁷ Pashìshe mémè kubàmbila ne: “Nudikù bajingùlùle ne mmu dībà kaayi mutùdì pàdì virgò mukùtākàne awu ùbanga kulòmba maanyi anyi?” Cìvwa ncikondo cyàkalwà Mubàki, ne bantu, bāvwa badìlongòlòle babwelè. Kaa, ndi ne disànkà dyàbúngì dyà kumanya ne tudi ne mwoyi mwab'ewu mu matùkù a ndekeelu aa. Nwamònu anyi? Ndi ngeela meeji ne tudi ne mwoyi mu cimwè cyà ku bikondo byà bitàmbe kwikala bilenga byà dikèma bikaadiku bàà pa buloba bapetè, ànu pa mulààdilu menemene wà Dilwa dyà Mukalenge. Abi kī mbilenga bilayà anyi? Elààyi bì meeji ne, pa dībà kanà dyònsò mpindyewu, Mifundu yònsò yikaadi ànu pabwìpì ne kuula! Nènku tudi baMwindile pa dībà kanà dyònsò. Nènku bivwa bikèngela twètù kwikala ne mwoyi mu dindila dyà mùshindù awu, ne, ànu pa dībà kanà dyònsò cidì mwà kwenzeka. Ikàlaayi mu cyuyùya cyà disambila, badìlongòlòle!

⁸ Mu yimwè yà ku miyiiki yà bàbìdì leelù ewu, mémè, mu ùmwè wà ku yòyi, ndi mutwilàngàne ne mpandanjila kampànda wa ku Formosa, mukàji wa bukitù, wa bidimu makùmì mwandamutekètè ne bisàtù, kàdì mufwànyine kwangaciibwa bu wa bidimu bitwè ku makùmì ànaayi ne bitaanu. Wa bwalu yèyè ùcidi ànu—ànu Mándèmwàzelè, ne ùvwa ne cyà kwikala nsongàakàji mulenga kwisù. Ne ùvwa wàmba ne mmukolèle mu dikù dyà beena Kilistò mùvwà “èyowà” mwikàle èyowà, ne “to” mwikàle to. Nènku mmukolèle mu dilongesha dyà dīsù dikole adi. Ki kwambayè ne: “Mwanèètù Branham, pāmvwà ne bidimu bu, kaa,” yèyè ne, “bidimu bitwè ku mwandamukùlù, mvwa ndyàmbidila ne mvwa mufile mwoyi wànyi kùdì Mukalenge Yesù.” Yèyè ne: “Pàngàakapetà bidimu bitwè ku dikùmi ne bibìdì, kunseeswishabò kùdì mwambi kampànda wa cyena-màngumba ne, ndi ne cyà kupeta dibènesha

diibìdì,” ki yêyè ne, “ki mêmè kuseeswishiibwamù bibì be.” Kàdi yêyè ne: “Pàngàakapetà bidimu bitwè ku dikùmi ne mwandamutekète, mêmè kupeta cyà bushùwà Nyumà Mwímpè.” Nènku yêyè mmwalùkile mûneemu mpindyewu ùteeta bwà kutàbuluja yimwè yà ku èkèleeziyà yà ba-Baptistes yidi milààle eyi. Kwambayè ne ní—ní kùvwa cintu cikaadiyekù mumòne ne “ncifwè,” yêyè mwinè awu m’Baptiste, yêyè ne, “ng’èkèleeziyà mifwè yà ba-Baptistes eyi kuntweku.” Kuyibìikilayè ne “nzùbù yà bitàlù.”

⁹ Mêmè ne: “Èè, ngeela meeji ne paùdi ku mwalu wà mvita . . .” Ngeela meeji mpindyewu ne yêyè ùdi . . . Anjì elààyibi ànu meeji, mêmè ewu, ne bidimu makùmi àtaanu ne bìbìdì, yêyè ùkaavwa muyè bu mpandanjila kumpàlà kwà mêmè kulediibwa. Nènku mêmè kùnu ngeela meeji mûmvwà ngenda nkùlakaja ncìciyi mwà kuya mu budimi bwà bwambi. Nènku ndi ngeela meeji ne: “Èkèlekèle, mfwilèku luse, Mukalenge.”

¹⁰ Kàdi yêyè, ne mubidi tumatuma, mukolàkàne kàbìdì ne meeji matwè ne mwèndè mwònsò. Ne pashìishe ùndondela malabula a mu njila, ne mùvwà Èvànjeeliyò ùkèngediibwa mu Formosa ne—ne mu Chine, ne mu Japon, ne myaba mikwàbò. Ki kumuumushabò mu budimi bwà bwambi, bàmba ne: “Kwèna mwà kuya mu madimi a bwambi paanyimà pàà wèwè mumanè kwikala ne bidimu bipite pa makùmi mwandamutekète to, udi mumanyè’s.” Ki kumwalujabò. Kàdi yêyè kààkushààla mupùwe to, ùdi ùya ku mpungilu yònsò yà ba-Baptistes eyi. Ki yêyè ne: “Billy Graham,” yêyè ne, “mùshindù wùvwàye ùtwàla mukenji wà ba-Baptistes awu, s’ndipangisha èkèleeziyà wà ba-Baptistes bwà kuya kumpàlà.” Yêyè ne: “Kèna ùbàfikisha bule menemene bwà kupetabò Nyumà Mwímpè to,” mwàkambayè. Kaa, mwanèètù wa bakàjì, shààla wèwè ànu ne cyòci aci. Aci ncyà bushùwà. Kwambayè ne, ba-Chinois abu kuntu kwàka, kwambayè ne kàvwakù mufwànyine kubàlekela bàya ànu nànu bàmba ne: “Tudi twitabuuja Yesù Kilistò” to. Yêyè ne: “Bivwa ànu bìmpè,” kàdi yêyè ne ùvwa ùbàshààdisha mwab’awu too ne pàvwa cintu kampàndà cyènzeka, ne dìbà adi bàlwa beena Kilistò bàà cyà bushùwà.

¹¹ Mêmè ne: “Ki mùshindù wùyaayàbì’s, mwanèètù wa bakàjì. Ùbàmbilè wèwè ànu cyanàànà, bàshaalè too ne pàdi cintu kampàndà cyènzeka.”

¹² Mpindyewu, ambaayi tũng bu ne bàpostòlò bàakamba, paanyimà pàà matùkù citèemà ne: “Tudi twitabuuja ne twàMupecì, nwamònu’s, tùMwitàbùùjaayi ànu ku diitabuuja cyanàànà ne tütungunukàayi ne mudimu wètù.” Nwamònu’s, nùnkù kí mbikùmbànekù to. Bààkindila muntwamu too ne pààkamanyàbo ne cintu kampànda cyàkenzeka. Nènku ki lutàtù lutùdi naalù twètù leelù ewu ndwòlò alu, katwèna tushààla ntàntà bule bukùmbàne to. Èè, ki bwà cinyi pashìishe tudi mwà kwikala ne nsòmbelu ànu wa mùshindù kanà wònsò, kwenza

cintu kanà cyònsò, kabiyi bitùtácisha to, mbwalu katwèna tushààla mwaba awu ntántà bule bukùmbàne to. Leelù tudi munda, mààlabà tudi pambèlu, ne mùshindù *kampànda* ne mùshindù *kansanga*. Twètù tushààla ntántà bule bukùmbàne too ne paùdi ubwela ne ukànga ciibi paanyimà pèèbè, díbà adi neùshaadilè munda amu. Udi mutwibwe citampì too ne ku ditùkù dyà bupikudi bwèbè. Mémè ndi ne disànkà be bwà bwalu abu.

¹³ Nènku tudi bapicìle mu cikondo cyà dicyònkomoka, bu mûngàmbi, mu Phoenix ne mu cibandabanda ne munkacì mwà bààbùngì bàà ku beena Kilistò mwàmwa, bààbùngì bàà kùdìbo kacya bààkwatakù ne mwoyi mujimà.

¹⁴ Ngàkabànda ku Mukùnà wa ku Sud, mukàjàànyì udi paanyimà pààpa wàwa, ne mémè. Dìngà ditùkù, balundà bàànyì, mwanèètù wa balùme, Doc, mulamè bânà bàà bakàjì bàbìdì abu, ne—ne Mwanèètù wa balùme ne Mwanèètù wa bakàjì Wood balamè mwànà wa balùme awu, nènku mémè ne mukàjàànyì tuvwa twenza dipèngama dyètù diibìdì dyà kacya tusèlangana. Ki mukàjàànyì ne: “Bill, udi mumanyè’s, edi nùнку divwa dipèngama ditàmbe dyà kumpàla adi.” Yèyè ne: “Musangu wà kumpàla wutwàkayà bwa dipèngama awu, cintu cimwèpelè cìngààkenzà cívwa ànu kusòmba mu citùùdilu ne kwindila bwà wèwè kufùma ku dilemba dyà nyama,” mwàkambàye.

¹⁵ Ngàkenza bu kaadiyelè kakesè, nudi bamanyè’s. Mémè kudyàmbidila ne: “Èè, mpindyewu, ncyèna ne mfrangà yàbùngì to.” Muyilamine mu kaamukèbù kàà lwevènyà, mikùmbàne bwà kuya mu lwendu lwà bulembi, kàdi pààbì’s mvwa ne cyà kusèlangana mu muvù wà mabèjì àpòòpoka awu. Ki mémè kudyàmbidila ne: “Ndi mbisanga ànu byònsò pàmwè,” nudi bamanyè’s. Nènku—nènku pàmvwà nya mu lwendu lwà bulembi apu, cívwa mwà kwenza bu dipèngama adi, nudi bamanyè’s, nènku ki twètù kubilamakaja’s. Kàdi ewu musangu twàkatùùla mfrangà ne twàkaya cyà bushùwà, ne, mòna’s, twètù kupicila mu cikondo cyà dicyònkomoka.

¹⁶ Ne bààbùngì bàà kùdìbo bàvwa bàà mu tabernacle emu. Ngeela meji ne Mwanèètù Sothmann, díkù dyèndè didi paanyimà pààpa, ne Mwanèètù Tom Simpson ne bakwàbò, ne Mwanèètù Maguire, ne twètù bònsò twàkapicila mu bikondo byà dicyònkomoka mu Mukalenge.

¹⁷ Nènku twètù kubànda ku Mukùnà wà ku Sud, wùdì ànu lwà ku sud kwà Phoenix, ne twètù kubànda e kushiyangana ne kàyùmbayùmba aku. Uh! Kàyùmbayùmba kàà mu cimenga cyà bwena-leelù aku’s! Kabyèna bikèmesha to pàdì bantu bàbanga kuvulangana pa buloba, mpèkaatù, ne ciputuku cibanga. Nènku mémè kutàngila kuulu aku, ne basòmbè lwà kuulu menemene aku bwà twamònakù mwà kumòna cibandabanda cyà Phoenix, mémè kwambila mukàjàànyì ne: “Ndi ndikonka ne mmisangu

búngì kaayì, kacya ànu twashààla basòmbe kaaba aka mu tusunsa dikùmi ne tútaanu etu, yìdì Dìna dyà Mukalenge ditèèdìibwe citèèlàtèèlà mu cimenga cyàcya?” Hmm?

¹⁸ Twámbe ne, èè, mu mwaba wà cimenga cinène, tubadilamù ne Tempe ne—ne Sunnyslope, ne mwònsò amu, ndi ncinka ne mùdi mùliyò mujimà wà bantu mu cibandabanda aci. Mémè ne: “Kùkaadi bidimu nkàmà yisàtù kùvwàmú kamùyì cintu to ànu ntùlu ne mibwàbwà mwómò emu. Ne pàmwàpa, ku mèsù kwà Mukalenge, bìvwa bifwànyine kwikala bímpè bu ne bìvwa mwà kwalukila mùshindù awu.” Ncyà bushùwà. Nànsha mùvwà cimenga cinènè—cinènè cidìbo bìibaka mwaba awu aci, ne nzùbù milenga kumòna ne bikwàbò, bìikàle bilenga amu. Kàdi bìvwa bifwànyine kwikala bímpè, bìvwa bifwànyine kwikala bitàmbe bwímpè bu ne balùme ne bakàjì bàvwa bàbànda bàpweka mu misèèsù ne byanza byela muulu, bìikàle bàtùmbisha Nzambi ne bàMwela twasàkidila. Kàdi, pamutù pàà cyòci aci, mmilawu, bintu byà lukutukutu, ndinwà dyà maalà. Dishidimuka didìdìngè ànu dibwelèmu, ki lwonji lùdi lùlwamù.

¹⁹ Mémè ne: “Mmasandi búngì kaayì àdì menda makèèlèlè dilòòlò, makèèlèlè dilòòlò awu mu cimenga eci! Mbantu búngì kaayì bàvwà bakwàcìke maalà! Mbúngì kaayì bwà mèkù... Mbintu búngì kaayì—búngì kaayì bidì byenza mu cimvundù mu dìbà dyàpìci edi, mu cimenga cinène eci!”

²⁰ Ki mukàjàànyì kungambila, kwambayè dìbà adi cintu bu nùnkù, mùmvwà ngeela meeji ne: “Dilwa dyà kaaba aka dìbà adi ndifwànyine kwikala ne mushinga kaayi? Udi muumukè kumbèlu bwà kulwa apa bwà cinyì?”

²¹ Pashiishe mémè kwamba ne: “Bwalu bùdi nùnkù ewu. Paanyimà pàà byònsò abi, bidì cyà bushùwà mu ciibúngì, kàdi kùdi banyààbanyà bakesè mwinshì amu. Mmasambila búngì kaayì a lulamatu àdìku mabànde dilòòlò dishààle edi muntwamu, ànu pàvwàbo mu njila batàngila ku disangisha apu?”

²² Ne Yèyè ùvwa mwímpè be kutùdi mu mùshindù wà ne èkèleeziyà yìvwa mifwànyine kwikala myùle patapata kumpàlà kwà dibwela dyà dìbà, mu mùshindù wà kanùyikù mwà kubwela mu bulà bùdi bunyùngùlùkile mwaba awu abu to. Ne malongodi awu ne bikwàbò, ki Mukalenge kwicikijaYè Nyumà Wendè ne kubàbèneshaYè. Ne mémè ncyàkadìkàndaku bwà kutuuta ne bukolè bwònsò to, mvwa mutùngùnùke ànu ne kutuuta ne Èvànjeeliyò awu. Nènku misangu mikwàbò, mu bushùwà bwà bwalu, mbìkolè be, kàdi ki mùshindù wùmwèpelè wùndiku pàànyì mucimanyè. Mbishilè mwab’ewu. Pa nànkù nebìikalè bitàmbe kushila ku Cibàsà cyà Cilumbulwidi kwàkèngelàbi bwà twètù kiimana. Pa nànkù, mu byònsò, cìvwa ncintu cyà butùmbi. Nènku tudi baswè kusàkidila èkèleeziyà

udi mwab'ewu ewu bwà kutùsambidila ne kutùtwa nyama ku mikòlò, ne—ne kutùlama pabwìpi ne nkùrusè.

²³ Nènkù mpindyewu mu dipingana dyà kumbèlu, mwômò emu, ne mvwa mufwànyine kwikala mulwè mu dindà emu pàmwàpa bwà kusambidilakù bàmwè bàà ku babèèdì. Ndi ne yimwè yà ku miyiiki yà bàbìdì yìdì mindìle, maalu a bàmwè bàà kùdìbo àndì mupetè mu ndambù wa matùkù à kacya ndwa kaaba aka, àvwà mindìle ngondo mujimà kacya nya. Pa nànkù bàdì bàteeta bwà kubwela ne kufika kùdìbo ne lùkàsà lwònsò, kubapetela mu myaba mishìilèshìilàngàne mùdìbo bàsanganyiibwa amu.

²⁴ Bu Mukalenge mwà kwanyisha, mu mbingu mikwàbò bu yìbìdì nànkù awu, nyààya ku Tucson, aci nciùpà cyà kwìnshì menemene. Nènkù mpindyewu beena kantu-ku-byanza musangu ewu, bwà nwàsambilaayikù bwà cyòci eci. . . Mémè nciùkù muswè kwenza cintu pàndì nciyi mwanjì kwitabuuja ne ndiswa dyà Mukalenge to. Mpindyewu, mpungilu udi ulonda neènzekele mu Modesto ne pashìishe kuumuka amu kuya ku Washington, province awu, Washington, ne ku Zurich, pashìishe ku Pàlèstinà, ne pashìishe kubwela mu Àfrikè wa ku Sud. Ne byònsò abi bìdì byènzeka pankaci pàà mpindyewu ne ngondo mwisambòmbò. Nènkù mvwa mubiikìdìbwe bwà kwikala mwakudi wa mu mpungilu yònsò eyi. Nènkù mbifwànyinekù kumpà mpùngà wa kubwela cyàkàbìdì mu Àfrikè wa ku Sud. Dibìikila dyàbò, ku ngondo yònsò tudì tupeta dibìikila. Kàdì bu umwe. . .

²⁵ Kùdì ditàpuluka dinène mu èkèleeziyà, èkèleeziyà yà beena Mpenta. Nènkù wèwè muyè ku luseke lùmwè, bàà lukwàbò luseke kabààkwikalakù naaci bwalu to. Ne kabààkuswàku bwà kukwàcìshangana mu mudimu to, pa nànkù ndì ànu muditòle mpindyewu kùkaadi bidimu bitwè ku bitaanu mwikàle ne dibìikila mu mwoyi wànyì bwà kuya. Nènkù mpindyewu, pàmwàpa bu beena kantu-ku-byanza mwà kungaakidila, ànu bikùmbànekù bwà kushindama, aci nku nseke yònsò yìbìdì, nudi numòna's, nènkù aci cidikù cyèza ne bònsò bàlwe kutwilanganakù. Bìdì bikèngela bwà kulwàbò ne kukwàcìshangana mu cyòci aci bwalu majinga a mfrangà—majinga a èkèleeziyà yàbò àdikù, pa nànkù bikèngela bàlwe bwà kudìbingisha, nwamònu's. Pa nànkù pàmwàpa ncifwànyine kwikala diswa dyà Mukalenge, nànsha nànkù, mémè ncyèna mumanyè to. Cìdì cyùmvwika cìmpè, kàdì mémè ncyèna mumanyè to.

²⁶ Ne pashìishe, mu cidimu eci, Mwanèètù Borders mmumpèeshe ndongamu wa myaba yà kuya, anyì, mabiikila. Nènkù, bwà kwamba menemene, cìvwa mmukàndà wà mupimbu *mòna* bunène wùdì mulwè kacya ànu ku Noël mushààle awu, wa mabiikila eku ne eku. Mbipìte bùngì bwà meeji a buntu bwà kuteeta bwà kucikumbaja, pa nànkù ncyèna mwangate nànsha

dimwè dyà ku ôwò to. Nèngàngatè ànu disangisha dimwèpelè, ne ngindilè bwà mmonè mwaba wùdi Mukalenge ùngambila bwà kuya kuumukila apu awu, pashiishe nênye ku wùdi wùlondà, ne pashiishe ku wùdi wùlondà, ne kwònsò kùdiYe ùngambila bwà kuya aku. Pa nàнку, nwànsambidilaayikù.

²⁷ Ndi mvùluka cidimu cishààle eci, pàmwè ne Mwanèètù wa balùme. . . anyi Mwanèètù wa bakàjì Cox ùdi kuntwaku awu, pàakambiikilà Mwanèètù Arganbright bwà nye mu lwendu elu lwà ku Anchorage. Kàdi bu ne mvwa mukùye ànu ku didicinkila ne bìvwa ànu bìmpè?

²⁸ Mpindyewu, mvwà ndyambidila ne, *didicinkila*, mvwa muiishe pa cyena-bwalu aci. Mémè kwamba pàngàakayà kuntwaku apu, kwambila bakwàci bàà mikàbà yà mèyi abu ne: “Kanwàngaci mikàbà yà mèyi to. Kanùyi bwà kakwata mikàbà yà mèyi to, nényiishè pa byena-bwalu bìmwèbìmwè bìmvwà muiisshè apa abi.” Ngeela meeji ne mvwa muiisshè cìmwè cìmvwà muiishe kaaba aka, bikwàbò byònsò bìvwa bipyabìpyà. Ki Mwanèètù Maguire kubipetayè, byònsò abi.

²⁹ Kudicinkila. Nènku bu ne mvwa muyè, mwikàle *ndicinkila* kuntwaku, nùнку's mbishiilàngàne cyà bushùwà ne mwàkenzekàbi amu, nùнку cikèèna-kumòna aci kì ncyùle to. Kàdi cikèèna-kumòna aci cyàkuula, ne nwènù bònsò nudi bamanyè aci, mwàkabèneslà Mukalenge.

³⁰ Mpindyewu, kùdi cikwàbò cintu cìdi mu mwoyi wànyì kùkaadi ntàntà mule. Èkèleeziyà, nùcisambidilaayi. Nwènù bònsò aba nudi bamanyè ne kacya ànu pàncìvwà mwànà mutekète nцитukù mwanjì kusànkishiibwa mu ditùnga edi to. Mwoyi wànyì wònsò wùtu misangu yònsò ànu mijingèjinge kuya ku Wesètè. Ne ndi mvùlùke pàmvwà nkòsela màmwènàanyi mashinda mu kaalubànzà kakesè aku kuntu kwàka ne kàvwa. . . kàvwa nkàà èkèleeziyà ewu, mwaba awu. Mvwa musòmbè pa bibàndilu, ki Nyumà Mwìmpè kwakula naanyi, kwambaYè ne: “Ncyèna mwà kutùngunuka ne kukubènesha to paùdi kùyi uNtùmikila mu kaabujimà, bu Abraham.” Nwamònu anyi? Nènku, Abraham, Nzambì ùvwa mumwambile bwà kutàpulukayè ne kuyayè pàà nkàayèndè. Nènku, pàakaditàpululayè, yèyè wàkangata tatwèndè, ne mwànà wa mwanàabò e kuyayè naabò. Ne too ne pàakalwà Abraham kutùmikila Nzambì mu kaabujimà, ki dikùmbana mu kaabujimà dyà cìvwà Nzambì mumulayè kwenzekadi. Nènku mwonjì, ùmwè wà ku myonjì minènè yìdi minswike kaaba aka, ùvwa mmàmù. Aci nudi bamanyè. Kàdi mpindyewu mààmù wàmanyi kuya bwà kiikala ne Mukalenge Yesù. Nènku ncyèna—ncyèna mumanyè ne njila wa kuya ngwepì, cyà dyenza ncinyi to, pa nàнку nwànsambidilaayikù.

³¹ Mpindyewu, Mwanèètù Neville, ndi mubànde pa cibùmbà cyà ku cyambilu apa, ndyambidila ne: “Èè, nênye kuntwaku.”

Muntu kampànda kutwilanganayè naanyi ne kwambayè ne: “Ekèlekèle, bàdi ne disangisha dinènè be dilòlò edi.” Yèyè ne: “Nebènzè mudimu wà diyiiisha, mudimu wà misambu, mudimu wà milòmbò, ne pashiishe kusangisha milàmbù, ne pashiishe mbambè ne bàdi ne—bàdi ne dyoweshangana dyà màyi ku makàsà, mèèsà a Mukalenge, ne mudimu wà dibàtiiza.”

³² Mémè kudyàmbidila ne: “Mukwàcikwètù! Ekèlekèle! Ekèlekèle, byònsò abi, ndi mumanyè mudìbi, pàmwápa paanyimà pàà muyiishè bikolè mu dindà emu.” Mpindyewu, mémè kudyàmbidila ne: “Nènyemù, pàmwápa neáswe bwà mémè ndiishè mèèsà a Mukalenge.”

³³ Ki yèyè ne: “Udikù mwà kutùyiisha dilòlò edi anyi wèwè udyùmvwà mulombòdiibwe?” Pa nàнку mémè’s ndi mumanyè cìdì aci cyùmvwija. Ki dībà adi mémè kwalukila e kwangata Mufundu kampànda mwab’ewu ne kwangata tuntu ndambù tùmvwà mufunde, nènku pàmwápa Mukalenge neànkwàcishè bwà kuyiishakù ànu kaaDiyiisha kípì kàà mèbà matwè ku ànaayi cyanàànà, ne pashiishe netwènzè dyoweshangana dyètù—dyètù dyà màyi ku makàsà adi, ne pashiishe mèèsà a Mukalenge. Ne pashiishe, nènku, kaa, mémè, pàmwápa nèngìikalè mujikije kumpàlà kwà dībà adi. To, mvwa ànu nnùyòbola cyanàànà. Tusunsa tutwè ku makùmi àbìdì, makùmi àsàtù, ne pashiishe netwènzè dibàtiiza, dyowesh- . . . Cìdì cilondà eci ncinyì, mmèèsà a Mukalenge anyi? Mèèsà a Mukalenge ngàdì àlondà eci, pashiishe mudimu wà dibàtiiza.

³⁴ Mpindyewu, tudi ne disànkà dyà ne nenùbatiijiibwè. Mpindyewu, Nzambì Yèyè mwanyishe ne byòbì bìMusànkisha, ne biikàle bimpè bwà mpaasàtà ne cisàmbà, mu dindà dyà dyàlumingu dilwalwà edi nèndwe bwà kusambidila babèèdì, ne kuyiisha, bu Mukalenge mwà kwanyisha, dyalumingu dilwalwà edi, bwalu pàmwápa dyàlumingu dyàlondà nèngìikalè cyàkàbìdì muyè dībà adi. Nènku mpindyewu pàndimu apa, ndi muswè kubwela ne—ne kwakulakù kaaba aka, bwalu tudi mu mùshindù kampànda baswikàkàne bu bànà bàà muntu, ne mémè ne Mwanèètù Neville mwab’ewu, ne tudi—tudi banangàngàne muntu ne mukwèndè, ne tudi—tudi—tudi baswè kushààla pabwìpì ne kwambulwishangana muntu ne mukwèndè bu . . .

³⁵ Eci cidi cyùmvwika bu cyà cinyangakaja cijila’s, kàdi ndi ntèkemenà ne kacyèna cyùmvwika mùshindù awu kunùdì to, mwàkambà Mukalenge Cory musangu kampànda, yèyè . . . mvwa nsanganyibwa mu diswishà dyà myèndù, mwikàle nsùmbishila cyàpù aci ma-àmpulès. Nènku yèyè kusumba ma-àmpulès búngì cyanàànà yìvwà mwà kumulama munda mwà bidimu binaayi anyi bitaanu, mémè kukùdimuka e kusumba kàshinyì kàà Ford kùdiye. Yèyè ne: “Billy, ngeela meeji ne tudi ànu tukoonyangana paanyimà muntu ne mukwèndè’s.” Nènku aci’s, èè, s’cìdì ànu dikwàcishangana mu cikondo cyà lukèngelu. Pa nàнку aci’s—

aci's mmwômò. Tudi bamanyè mwa kulwa ku disungilangana ku njìwù ne dikwàcishangana muntu ne mukwèndè.

³⁶ Mpindyewu, tûyaayi ku citùpà cyàci cyà meeji matòòke mpindyewu, ne mèmè nciyi mutùpàkàne to, ngeela meeji ne ndi mmòna Mwanèètù Beeler paanyimà pààpa lwà mu ndekeelu mwàmwa, mwambi neetù mukwàbò. Ne leelù ewu pângäpici, Mwanèètù Junie Jackson ùvwa mwimàne pambèlu apa mu bulà ne Mwanèètù Creech. Bātu misangu mikwàbò ne mudimu mwab'ewu anyi? Mudimu wà dibàtiiza, mûndi mmòna. Èyo, tudi mwà kulongolola mâyi pìikalàbo mwa kupeta muntu. Tudi—tudi ne mâyi, èyo.

³⁷ Pa nàнку mpindyewu, bu mudibi ne netwikalè ne mèèsà a Mukalenge, mvwa ndyàmbridila ne mbifwànyine kwikala bîmpè bu mèmè mwà kwakula pa mèèsà a Mukalenge ànu bwà tusunsa tukesè cyanààna.

³⁸ Mpindyewu, kumpàlà kwà twètù kusemena ku Dîyi, tuteekàayi bintu byònsò ku luseke mpindyewu, ne ngenzèlù yètù yònsò yà bwàna ne yà bilelè ayi, bwà—bwà tusemenè mu Bwikadi bwà Nzambi ku disambila. Tùsambilàayi. Mpindyewu ne mitù yètù miinyika, ne ndi mutwishiiibwe ne myoyi yètù kàbidì, kwòkò dilòmba kampànda mwab'ewu didi difwànyine...dyùdì muswè bwà dimanyishiiibwè kùdì Nzambi, ne muswè bwà nkuvùlùkè kumpàlà kwà Nzambi, swàku ùdimanyishè mu kwela kwà cyanza muulu kùdì Nzambi. Nzambi àfilèku dilòmba dyà muntu ne muntu.

³⁹ Nzambi wa Bukolè bwònsò, Taatù wa Mukalenge wetù Yesù Kilstò, WàkaMubiisha ku bafwè ne kuMushikika ku dyàbalumè dyà Mutàmbe bunène, mwikàle ne mwoyi kashidi bwà kutwàkwila pa bintu bitùdì twitabuuja ne Wàkatwenzela, ne tujikula ne ki mùdibi. Tudi tulòmba, Mukalenge Nzambi, bwà dilòòlò edi ne, Úfwekù mpèkaatù yètù luse. Kaa, tudi baswè kushààla mwinshì mwà Mashi misangu yònsò, bwalu katwèna bamanyè menemene cidì cifwànyine kwenzeka to. Maalu ònsò àkaadi pa kutwà ku ntengu, mutùdì tudyùmvwa, Mukalenge, ne dilwa dyà Mukalenge dikaadi pabwìpi. Ne tudi tudilongolola bwà kwenza lwendu. Nènku patùdì twela meeji ku lwendu, tudi bafwànyine kutùma meeji ku mishèètè, ne—ne bilàmbà byà pamutù ne bisàbaatà byà pamutù. Kàdì mùshindù mwinè wùdì elu lwendu lushilàngàne's! Kí ndiswikà dyà mabùki to; ndiàsùulula, diàtèèkà dyà ku luseke. Bu mwàkambà musadidi Webè munène, Pòlò, mu Mukàndà wa Ebèlù, nshapità wa 12 ne: “Tudi tutèèka ku luseke bujitu ne bujitu bwònsò ne bupidyà bùdì butùjìngilà bipeepèle nùнку abu, bwà twamòna mwà kunyeema ne lutùlù lubilu lùdì lutùtèekela kumpàlà kwètù alu.”

⁴⁰ Nènku twètù katwèna mpindyewu mwà kwamba cipròfetà cyà bintu bîmpè bwà bàà pa buloba bwà cyena-leelù aba to. Cintu cimwèpelè citùdiku mwà kwamba mu cipròfetà ku Nyumà

ndikèngà dyà cìmpicìmpi, ntàtù, dikanka dyà buloba, mavwala manènè a màyi a mbù, dìbà ne ngondo bipangila kufila nsèsà, èkèleeziyà mu cikondo cyà Laòdikiyà, Kilistò pambèlù pàà ciibi, ùkookola bwà kubwela. Éyi Nzambi! Ànu mùvwà Miikà wa kale awu, mmunyi mùvwàyekù mwà kubènèsha Aakàbà pàvwà cipròfetà cimulwisha? Mupròfetà munène wa bukolè awu, Eliyà, pàakaseemenàye kùdiye, ne bwalu ùvwa mushipè muntu uvwa kàyi mwenzè bwalu, Naabòtà awu, ki kwambayè ne: “Mbwa neyilakè mashi èbè.” Kàdi mmunyi mùvwàku Miikà mwà kwamba cipròfetà cìmpè?

⁴¹ Mmunyi mùdiku bânà bàà leelù ewu bàdi bùle tètè ne Nyumà mwà kwamba cipròfetà cìmpè bwà bantu babì, bàdi kabàyi bàcyùka maalu bàdi biipàte Mukalenge baMushiye pambèlù abu? Éyi Nzambi, tudì tumòna ànu bululu bwà cilumbulwidi cìcilwalwà. Ne twela mbilà mikolè kùdi aba bàdi kabàyi balulàme ne: “Nyeemènaayi kùdi Mukalenge, bwalu Yèyè ki udi Lubwebwe mu buloba bùme! Yèyè ki udi Ciikishilu mu cikondo cyà cipeepèlè cìkolè cyà mvùla. Ne Dìna dyà Mukalenge didì Lumbu Lukolè, ne baakànè bàdi bànyeemenaMù ne bàsanganyibwa mu dikùbiibwa.” Mwine mutùdiku mwà kutùma meeji ku bimenga binène biibaka, byà cinyeemenu abi, ne pàvwà mulumbacyanganyi. . . paanyimà pàà muntu awu ne yèyè mubwelè mu—mu lumbu amu, ùvwa mu dikùbiibwa, cintu nànsha cìmwè kacivwakù mwà kumulenga to. Éyi Nzambi, tùnyeemèku bakolèshe batàngile kùdi Mukalenge, bwalu Yèyè ki udi Cinyeemenu cyètù ne Dikànda dyètù, ne dikwàcisha mene ditù kadiyi dipangika mu cikondo cyà lutàtu. Pa nànkù, pa kumòna ne dísù dyà mukankù, mutùdi mwà kwamba, lutàtù lùvula, mavuba àdyùngwija, mikungulu ne mikenyi yà cilumbulwidi yidikùma pa buloba, tudì tumanya ne mvùla wa cipùpù ùdi pabwipi.

⁴² Dilòlò edi, Mukalenge, tudì tulòmba bwà aba bàdi beelè byanza byàbò muulu. Mèmè ncyèna mumanyè civwàbo baswè to, Taatù, Wèwè ngudi mumanyè. Ndi ndòmba bwà Wapèèshakù misùùkà yàbò yà musinga mukolè ayi bintu byònsò, dilòmba divwà cyanza aci cyelela muulu. Enzàku nànkù, Mukalenge. Ondòpàku babèedi. Kànkamikàku bazengèle. Filakù disànkà kùdi bacìncimikùibwe. Filakù ditalala kùdi bazengèle, cyàkudyà kùdi bàdi ne nzala, cyàkunwà kùdi bàdi ne nyòòtà, disànkà kùdi bàdi babungàme, bukolè kùdi èkèleeziyà. Mukalenge, twàlakù Yesù munkaci mwètù dilòlò edi, patùkaadi tudìlongolola bwà kwangata mèèsà a Mukalenge àdi àleejà mubidi Wèndè mucibùlùke awu apa. Tudì tulòmba, Mukalenge, bwà Yèyè kutùmwènelakù mu mùshindù wà pabwàwù.

⁴³ Bèneshàku disangisha dikesè edi, mpaasàtà wadi munanga ewu, Mwanèètù Neville ne fàmiyè wèndè, ne balami, balubuludi, ne muntu yònsò udipù awu. Bèneshàku bakwàbò, Mukalenge, pa buloba bujimà, bàdi bindile ne disànkà dilwa dyà Mukalenge

abu, myëndù milongolola, ne mimbùndà yà míshi misukula yònsò, ne Bukênkè bwà Èvànjeeliyò bwikàle bùkenka mu myaba yà mîdimà.

⁴⁴ Mpindyewu, nkwaçishèku, Mukalenge, ne Mèyi makesè aa. Àbènèshèku patùdi tuÀbala apa, ne tûpèèshèku dyumvwija, bwalu tudi tulòmba nùnkù mu Dîna dyà Yesù. Amen.

⁴⁵ Mpindyewu tudi bafwànyine kubuulula mu Mukàndà, ku nshapità mwi6 wa Yone Munsantu, ne mbifwànyine kwikala bìmpè bu muntu ne muntu wa kutùdi mubalè nshapità mujimà ewu patwikalè baalùkilà kumbèlu apu. Ndi muswè kubala, kubangila ku mvensà wa 47, kupweka too ne ku wa 59, mukùmbajilakù, ànu bwà mùshindù wà kwibaka cyena-bwalu cyà: *Meesa À Mukalenge*.

Yesù ngudi wakula mpindyewu ewu, ku difestò. Cìvwa ncikondo cyà dicyònkómoka, maafestò aa. Bààkanwà mâyi a mu lubwebwe, bwà kuleeja Lubwebwe lùvwà mu cipeela alu. Nènku bààkadyà, bwalu manà àkaavwa mamatè kùkaavwa bidimu nkàmà yàbúngì, bu civùlukilu. Cìvwa ànu difestò dyà paasàkà cyanààna, mutùdi naadi dilòlò edi emu.

Bulelèlà, bulelèlà, Ndi nzwàmbila ne: Ewu udi ungiitabuujà mèmè ùdi ne mwoyi wà kashidi.

Mèmè ki dyàmpà dyà mwoyi adi.

Baatatwènù's bààkadyà manà mu cipeèlà, kàdi's mbafwè.

Eci ki dyàmpà didi dipweka difùmina mu dyulu, didi muntu mwà kudya, ne kàyi mwà kufwà to.

Mèmè ki dyàmpà didi ne mwoyi didi difùme mu dyulu: muntu yèyè mudyè dyàmpà edi, yèyè neikalè ne mwoyi bwà kashidi; ne dyàmpà dîngààfilà mmubidi wànyì, ki wúngààfilà bwà mwoyi wà bàà pa buloba.

Pa bwalu abu beena Yudà bààkakòkangana munkaci mwàbò, bàmba ne: Mmunyì mùdi muntu ewu mwà kutùpèèsha mubidi wèndè bwà twètù kudya?

Pashiishe Yesù wàkabàmbila ne: Bulelèlà, bulelèlà, Ndi nzwàmbila ne: Nwènù kanùyì badyè mubidi wa Mwàna wa muntu, ne banwè mashi èndè to, kanwèna ne mwoyi munda mwènù to.

Ewu udi udyà mubidi wànyì, ne ùnwa mashi àànyì, ùdi ne mwoyi wa cyendèlèlè; ne mèmè nèmmubiishè ku lufù mu ditùkù dyà ndekeelu.

Bwalu mubidi wànyì wùdi cyàkudya cyà bushùwà, ne mashi àànyì àdi cyàkunwà cyà bushùwà.

Ewu udi udyà mubidi wànyì, ne ùnwa mashi àànyì, mmusòmbèle munda mwànyì, ne mèmè munda mwèndè.

Bu mùdi Taatù udi ne mwoyi muntùme, ne mêmè mwikàdìlè ne mwoyi ku Taatù, pa nànkù ewu udi undyà, nànsha yéyè neikalè ne mwoyi ku mêmè.

Edi ndyâmpà didì difùma mu dyulu adi; kî mmùvwà baatatwènù badyè manà amu, kàdi bafwè to; kadi ewu udi udyà . . . dyâmpà edi neikalè ne mwoyi kashidi.

Bintu ebi yéyè wàkabyàmba mu nsunàngòngà, pàvwàye ùlongesha mu Kaapènùmà.

⁴⁶ Mukalenge àbeneshèku Dìyì Dyèndè. Ndi muswè, ànu bwà tusunsa tukesè cyanààna, kwakula pa: *Mèèsà À Mukalenge*. Mwakù ewu *Kòòmunityò* wùdi wùmvwija cinyi? *Kwenza kòòmunityò* mbwena kwamba ne “kuyiikilangana.” Bwà kwikala ne, bwà . . . *Kòòmunityò* ùdi bulelèlè ùmvwija ne “kwikala ne bwobùmwè, kuyiikilangana muntu ne mukwèndè.” Wèwè uyiikila ku tèlefonè ne muntu, nudi nwenzakù muyiikì, nudi nwenza kòòmunityò muntu ne mukwèndè. Ne bu twètù mwà kuya ku luseke ne kwimanyina mu ndekeelu mwà citanda mwàmwa, muntu kanà yònsò ne mpaasàtà, anyi bantu kampànda bàbìdì, bàdi bènza kòòmunityò muntu ne mukwèndè.

⁴⁷ Mpindyewu, kanwèna nwenza kòòmunityò ku cisanji cyà tudyòmbà to, bwalu kwèna mwà kwandamuna to, anyi ku ntèlèviziyò. Kàdi pàdì . . . Nudi mwà kwenza ku tèlefonè, bwalu nudi nwenza kòòmunityò muntu ne mukwèndè, kabiyi ànu luseke lùmwè cyanààna to. Cìdì . . . Ncyèna mwà kwenza neenù kòòmunityò mpindyewu to, bwalu kanwèna nwandamuna to. Nènku, ki bwà cinyi, kî mbifwànyine kwikala dilwa kutèeleja mwambi kampànda ùyiisha diyiisha dyèndè to. Kì mbifwànyine kwikala nànkù to, kudìsanga, bwà kwenza kòòmunityò. Aci kî ncidì cifwànyine kwikala Kòòmunityò to . . . Wèwè ulwa ànu bwà kwenza kòòmunityò ne mwambi, udi mufwànyine kumubiikidila ku luseke, anyi muntu kanà yònsò ewu, ne kuyiikilangana nendè yéyè mulùme anyi mukàji.

⁴⁸ Kadi citudi tubwelela, mu mèèsà a Mukalenge, mbwà yònsò wa kutùdi bu bantu nkààya àyiikilanganè ne Kilistò. Kì dyenza dyà kòòmunityò ndyòdì adi. Dìbà adi, kuyiikilangana kakwèna menemene muntu *umwèpelè* wàkula, twètù nkààyeetù twakula to, kàdi nkwindile bwà kumòna cidìYe út wandamuna.

⁴⁹ Mpindyewu, pòpò apu, misangu yàbùngì, ki patùdi twenzela bilèma byètù binène, mbwena kwamba ne, twètù tudi twakula tumana katùyikù twindila bwà Yéyè kupeta mpungà wa kwandamuna to. Tutu misangu mikwàbò tuya, twamba ne: “Mukalenge, ndi muswè bwà Wèwè kwenza *cikampànda* ne *cikansanga*, amen,” kàdi tujuuka tuya. Mpindyewu, ncyà bushùwà ne aci kî nkuyiikilangana to. Aku nkuya kalòmba dyanyishiibwa. Kàdi paùdì ushààla ntàntà bule bukùmbàne too ne pàdìYe wàndamuna, ki paùdì wenza kòòmunityò mpòpò apu, uyiikilangana ne Mukalenge. Mpindyewu, ne mùshindù munènè

wà kuyiikilangana, ngwà kwikala bumvwàngàne, nudi ne cyà kwitabangana pa bintu kampànda. Mpindyewu, bitu bikèmesha misangu mikwàbò ne patùdì tupeta biinè bintu abi . . .

⁵⁰ Didyà ndiswikakajakù. Mpindyewu, panùdì nwangata beena kantu-ku-byanza, pàdìbo baswè kwenza kaabwalu kàà dipetangana, bàtu bàbiikila muntu bwà kuyabò ku didyà. Ne paanyimà pàà bamanè kusòmba ne badyè, ki kushiishabò kuyiikila muntu ne mukwèndè. Pa ciibidilu, ngèndààmushingà mwîmpè kèna mwà kwakula ne muntu mwikàle kàyi mwelè kantu munda to. Mbîmpè bwà kwindilayè too ne pàdiye ùdyùmvwà bîmpè, ne pashiishe paanyimà pàà yèyè mumanè kudyà didyà dyèndè dyà mu dîndà. Kùyi kuntwaku bwà kumujuula mu bulààlù bwà kumwambila cintu kampànda cyùdì ukèba kumusumbisha to, kàdi indilà too ne piikalàye mudyè didyà dyèndè dyà mu dîndà ne—ne musòmbekù mu mùshindù mwîmpè.

⁵¹ Ditùkù adi, pâmvwà nyiisha pa mukàji wàkoowesha Yesù màyi ku makàsà awu, mu Canada mwàmwa mùmvwà ngaakula pa cyôci eci, ngamba ne pàvwà mwenyi ulwa bwà kukùmbula muntu mukwàbò, muntu ewu ùvwa ne mishindù kampànda milongolola yìvwà yikèngela bwà kupicilabò kumpàla kwà kudyùmvwabò cyà bushùwà bakùmbànàngàne bwà kukùmbulanganabò, anyi, bwà kuyiikilanganabò. Dyendelangana ndiyiikilangana. Mpindyewu, bàvwà bàlwa ku . . . Babiikidiibwe, dyàmbedi bìvwà bikèngela bânji bàkubiikilè. Pashiishe uvwa mwà kulwa ku ciibi aku ne mwoweshanganyi wa màyi ku makàsà ùvwa wòweshangana màyi ku makàsà, bwalu mu lwendu, wèwè uvwa ne mupùùyà wà—wà nyama ne bikwàbò byà mu njila amu. Bòbò bònsò . . . bantu bàvwà bènzela ngendu mu njila umwèmwè pàmwe ne nyama, ne—ne dîbà adi kùvwà mupùùyà ne lupwishi, ne civwàlù cyà beena Pàlèstina civwa cìlwàmbula ne lùvwà lùlamata pa bisùlùlù byà ku mikòlò, ne kwisù kùvwà kakùyi kubwikila cintu aku, ne—ne ku byanza. Nènku—nènku bàvwà bàbiimanyikila ku ciibi aku, kùdì mwoweshanganyi wa màyi ku makàsà awu, ne ùvwa ùbòowesha màyi ku makàsà. Ne pashiishe muntu mukwàbò ùvwa mwimàne mwaba awu ne nsùmè ne—ne mànànanshi, nènku ùvwa ùmumyamina mànànanshi aa pa byanza, ne yèyè ùvwa mwà kuàlaabakaja mùshindù ewu, ne—ne ùàlaaba kwisù kwònsò, pashiishe wàngata nsùmè ùdikùpula. Aci civwa cyùmusha manyaanù ònsò ne mupùùyà. Nènku civwa ne cintu kampànda mu cyôci civwà cìfla citaleela, bu mùdì màntòlàtumù, ne civwa cyènza ne yèyè àdyùmvwèku bilenga.

⁵² Pashiishe pàvwàye ùbwela, kùyi muvwàle bisàbaatà byèbè byà kale byà manyaanù abi to, mu tàpì milenga ayi, bàvwà mwà kwikala ne tuntu tukèsè, bu mùdì pàntuufulè mikesè yà mu nzùbu ayi, nènku bàvwà bàbwela. Nènku dîbà adi mwenyi awu—awu ùvwa ùbwela ne—ne pashiishe mwakididyanganyi

awu ùvwa—ùvwa ùmutwà mishìkù yà dimujingila difika dilenga. Nènku, nwamònu's, kùvwa mwà kuswà bwà mwakididyanganyi kukutwàye mishìkù pawikalà ununka bibì to. Kùvwa mwà kuswà bwà kwendela pa tàpì ayi paùvwa ne manyaanù to. Ne pashiishe mukwakididi awu ùvwa ùkutwà mishìkù yà dikuujingila difika dilenga, ne díbà adi wèwè uvwa ànu umwe wa ku bàà mu nzùbu awu.

⁵³ Nènku, mpindyewu, Nzambi ùtu ne bintu byà mùshindù awu. Kumpalà kwà twètù kwikala cyà bushùwà badìlongòlòle bwà diyikilangana dyà Nzambi, tudi ne cyà kwanji kwoweshiibwa ne màyi a Dìyi. Ditàpuluka, màyi a ditàpulula àdi àtùtàpululà ne mpèkaatù yètù. Mpindyewu, cyà kumpalà, kwèna mwà kwakula ne Nzambi ne kwèna mwà kuyiikilangana ne Nzambi to, nènku kùdi. . . Dyàmbedi, bikèngela ùnyingalalè bwà byùdì mwenzè, bwalu kwèna mwà kwitabuujà bimpè paùdì kùyì unyingalala ne: “Mukalenge, mfwilèku luse ku bupidyà bwànyi” to. Nwamònu anyi? “Mfwilèku luse ku bupidyà bwànyi.” Bikèngela wànji kunyingalala, dyàmbedi. Nènku, paùdì unyingalala, díbà adi udi. . . mpèkaatù yèbè yà kale yidi yifwidiibwa luse, díbà adi udi muntu mudìlongòlòle díbà adi bwà dibàtiiza. Mpindyewu, pashiishe Yèyè mmulayè Nyumà Mwimpè, paanyimà pàà dibàtijiibwa.

⁵⁴ Mpindyewu, bwalu bùdìku bùdi ne, mu diyikilangana edi, tudi tusangana ne mùvwa dyoweshangana dyà—dyà màyi ku makàsà ne bintu biswikakaja ku cyòci aci, kàbìdì, bwà twètù kwowa màyi ku makàsà, bu cimfwànyi cya dikezudiibwa kùdi Nyumà Mwimpè.

⁵⁵ Mpindyewu, díbà adi, kùdi ne cyà kwikala njiyà kampàndà yà muntu ne mukwèndè. Panwikalà bùlùndù muulu bùlùndù panshì wèwè ne mwenyi webè—webè, díbà adi kanwèna—kanwèna mwà kuyiikilangana to. To, kanwèna—kanwèna mwà kucyènza to, bwalu wèwè udi ubèngangana nendè ku mèyi. Kàdi nwènù mu dipetangana, díbà adi nudi mwà kuyiikilangana. Nènku ki mùdibì patùdì tulwa ku mèèsà a Mukalenge, bìdì bikèngela bwà twikalè mu dipetangana ne Dìyi Dyèndè. Nwamònu anyi? Tudi ne cyà kwikala balediibwe cyàkàbìdì, Nyumà wa Nzambi munda mwètù wàmba “amen” ku Dìyi dyònsò didiYe mufunde, díbà adi tudi mwà kuyiikilangana Nendè.

⁵⁶ Eci nciitùdì bapetèle kùdi Nzambi ne, piikalà myoyi yètù kayìyi yitùpiisha to, díbà adi tudi tulengeleela Nzambi. Tudi bamanyè ne tudi tupeta mandamuna ku malòmba ètù, mbwalu myoyi yètù kayèèna yitùpiisha to. Mpindyewu, piikalà Nzambi ùtwàmbila ne tudi ne cyà kulediibwa cyàkàbìdì, kàdi katùyì bapetè dilediibwa dipyadiyà to, díbà adi netùdyũmvwèku bibì ndambù bwà kuya, bwà kaMulòmba nì ncinyi cyònsò, nwamònu's, bwalu tudi bamanyè ne katwèna bakùmbàje mishingà Yèndè to. Cintu cimwèpelè díbà adi cidi ndisambila

dyà ngènzàmpèkààtù. Kàdi tudi twakula Nendè patùdi mu bwobumwe Nendè, aci cidi cìtwàla kòomunyò.

⁵⁷ Mpindyewu, bwà mèèsà a Mukalenge, ndi njingakù kuumvwija kakesè ndambù. Mpindyewu, tudi twangata, citùdi tubiikila ne mèèsà a Mukalenge aci, ndyàmpà ne mvinyò. Mpindyewu, bàkaadi bacikònyàngàje mu mùshindù wà kabiyi mene bìmpè bwà kucyàmba to. Kaa, mùshindù mwinè wùdici cikònyangaja munda mwà bidimu's wè! Aci cyà bushùwà kî mmèèsà a Mukalenge to, cidi ànu dilama dyà dīyī ditùma. Nwamònu anyi? Mpindyewu, citùdi tucibīikidila ne n'kòomunyò, mbwalu ncfùmīne mu nsangilu wà ba-Kàtòlikè wa ne ng'“Ukàristiyà Munsantu, udi mubidi mwena diinà wà Mukalenge Yesù.” Kàdi kî mmubidi wà Mukalenge Yesù to! Mmu civululukilu cyanàànà cyà mubidi Wèndè.

⁵⁸ Nànsha bansaserdòsè anyi bayiishi bùngi kaayi, anyi nī nganyī udi ubènesha cyòci aci, cidi ànu dyàmpà ne mvinyò. Kakwènakù nsaserdòsè mutùdi...mùdibo bàtwàmbila, ne: “Nzambi mmwenzèjūibwè bwà kutèèlejila nsaserdòsè pàdiye ùkùdimuna kòomunyò apu,” cidibo bàbiikila ne n'kòomunyò aci, “Ukàristiyà, ùmukùdimuna ùlwa mubidi mwena diinà wà Mukalenge Yesù. Dìbà adi mwena kwitabuuja udi wàngata aci, ne aci kî mèèsà a Mukalenge.” Aci ncyà mafi!

⁵⁹ *Kuyiikilangana* kùdi “nkwakulangana ne, cintu kampànda cyùdi mwà kwambila bwalu ne cyòci cikwandamuna.” Kì diyiikilangana ndyòdi adi. Cyostiyà kaciyèna mwà kwandamuna to. Pa nàнку, mu bushùwà bwà bwalu, kòomunyò wa cyà bushùwà n'Nyumà Mwimpè mwikàle wàndamuna. Paùdi uMukonka, Pèndè wàndamuna, kî kòomunyò mulelèlè nyèyè awu. *Eci* ncfivululukilu, bwà kwangata...cyà dipoopediibwa Dyèndè pa nkùrusè ne dibīishiibwa Dyèndè dyà ku lufù, kàdi kî n'kòomunyò to. Tudi tucibīikila nàнку awu, kàdi kî ncyòci to. Ncfifumīne ku èkèleeziyà wà Kàtòlikè, mùdibo bàngata cyostiyà bu mutùvwà bumvwije ditùkù adi mu dilondangana adi amu, ne twamba cyòci aci pa *Bumpàngaanù Bùbèngangana Nè Bwena Kilistò*.

⁶⁰ “Mùshindù mwinè wùdi kaacyostiyà kakesè kàà cijèngù aka mubidi mwena diinà wà Kilistò.” Mpindyewu, kî cidi èkèleeziyà wà Kàtòlikè witàbuuja ncyòci aci. Nukààdikù bamòne, mu dipicila dyà ku èkèleeziyà, mùdibo bàtwa mu diina, bùumusha bifulu, ne bikwàbò amu anyi? Kì ng'èkèleeziyà awu to, ncyostiyà cidi muntwamu aci ne, “mubidi wùdi nsaserdòsè mukùdimūne muumūke ku cyostiyà mulwè mubidi mwena diinà wà Kilistò awu,” wùdi mpùku ne nkose mifwànyine kwangata kuya naawù awu's. Mòna's, kwèna, kwènakù mwà kwela meeji ku ngeelèlù wà bukàlàngà ne kwela meeji ne kapese kàà dyàmpà nkafwànyine kwikala mubidi wà Mukalenge Yesù to! Kacyènakù mwa kwenzeka to.

61 *Kòòmunyò* “nkuyiikilangana, ne cyôci cyândamuna, cintu kampànda cyùdi wakula naaci.” Mwakù mwinè *kuyiikilangana* mbwena kwamba ne “kwakula ne,” anyi, “kwikala muswikàkàne ne cintu kampànda cidi cikwandamuna.” Nènkù Nzambì ùdi ùkwandamuna, kòòmunyò. Ne cicidi ànu dyàmpà ne mvinyò, citùdi tubiikila ne n’*kòòmunyò*, aci’s.

62 Mpindyewu, Yesù mmwambè apa, pàndi mbala ne: “Mubidi Wànyì ncyàkudyà ne cyàkunwà, Mashì Àànyì, mubidi ne Mashì bìdi ncyàkudyà ne cyàkunwà.”

63 Mpindyewu, tudi baswè kwela meeji kùdi Yesù ne kuMusanga kutùdi, cìvwàYe aci. Mubidi Wendè ncinyi? Mubidi wà Kilistò ncinyi? Mmubidi wà beena kwitabuuja wùdi mudisangè Nendè mu Nyumà Mwìmpè. Kaciyi lupìngù to, kaciyi kapese kàà dyàmpà to, kàdi Nyumà udi mu mwoyi wà mwena kwitabuuja, ne biikàle badisangè pàmwè, bwà pàdi muntu ne Nzambì mwà kwakwishangana, bânà bàà balùmè ne bàà bakàjì bàà Nzambì. Muntu wa cìfwàkà, ku dyela dyà Mashì panshi kutwàlaci dilekelediibwa dyà mpèkaatù, nènkù mulùmè ewu ne mukàjì ewu, mwànà wa balùmè anyi wa bakàjì, udi mu bwobùmwè ne Kilistò ewu, ùdi ùyiikilangana Nendè, mubidi awu.

64 Ànu mùdi mulùmè ne mukàjèndè bafwànyine kusòmba ne kuyiikilanganapù, anyi mwànà wa balùmè ne mulundà wendè mukàjì amu, Kilistò ne Èkèleeziyà Wendè bàdi bàyiikilanga pàmwè. Ki bwà cinyi tudi mwà kuMumvwa wàkula, ne kumòna byà matùkù àcìvwavwà kumpàlà kwà kufikabi apa, ne mwà kwamba byà matùkù àcìvwavwà ne kwikalabi bipwàngàne, mbwalu tudi tuyiikilangana ne Nzambì Udi ne Cyendèlèlè mu cyanza Cyèndè awu. Kuyiikilangana muntu ne mukwèndè, Mubidi wà Kilistò, Mubidi musokòme, wà nyuma wà Kilistò. Kawùyi mudisangè ne lupìngù lwà mùshindù kanà wònsò, anyi ne dyàmpà anyi ne—ne mvinyò to, kàdi mu mmwènekèlu wa—wa nyumà.

65 Mpindyewu, Yesù wàkamba cintu cìmwècìmwè aci. Angàtaayi Yone Munsantu, nshapità mwi⁴, ùyiikila ne mukàjì wa ku ciinà cyà màyi awu, mukàjì awu ùvwa wàkula pa cintu bu ne: “Baataatù bèètù bààkanwà ku mpokolo ewu, ne bààkuumbula ciinà cyà màyi eci, Yakòbò, ne—ne yéyè wàkapà bânà bèndè ne ngombe yèndè màyi aa, kàdi Nwènù nudi nwamba ne: ‘Kuukwilaayi mu cimenga *kampànda*,’ ne bakwàbò bàmba ne: ‘Ku mukùnà ewu.’”

66 Yesù kwambaYè ànu—ànu bu ne: “Anjì indilà kakesè! Twètù tudi beena Yudà, ne tudi tuumvwa cidici, cidi dikuukwila dyùmvwija. Kàdi tèèlejà eci, wèwè mukàjì. Dìbà dìlwalwà, ne ki mpindyewu mene, dyàkuukwilà bakuukwidi balelèlè Nzambì mu Nyumà ne mu Bulelèlè. ‘Dìyi Dyèbè didi Bulelèlè.’ Nènkù Taatù ùdi wènda ùkèbangana ne aba bààMukuukwilà

mu Nyumà ne mu Dìyì, Bulelèlà. ‘Dìyì Dyèbè didi Bulelèlà.’” Mpindyewu, ki cyàkambilàYe mukàjì awu ncyôci aci.

⁶⁷ Nwamònu’s, Kilistò. . Nzambi n’Nyumà. *Kilistò* mbwena kwamba ne “mulaaba maanyi, muntu mulaaba Nzambi,” ki cìvwà ciMuvwijè Kilistò. Mpindyewu, Kilistò wàkamba ne: “Mémè ndi Cyàkudyà ne Cyàkunwà.” Kaciyi cyostiyà to, kaciyi cyostiyà citùdi twangata apa eci to. Aci kí n’Kilistò to. Mvinyò utùdi tunwà ku cyoshelu ewu, kí n’Kilistò to. Cìdi ciMuleeja Yèyè, mu mùshindù wà difwànyikija. Kàdi Kilistò n’Nyumà Mwímpè, dilaabiibwa dìdi pa Èkèleeziyà, ki Cyàkudyà ne Cyàkunwà.

⁶⁸ Mwadi wà mutàmbe bunènè wùdiku pa buloba bujimà, ndi ntèkemena ne muntu nànsha umwe wa kunùdi kacya kàtukù mwanji kuwùmvwa to, kàdi, pawikalà ukààdikù muwùmvwè, kakwènakù mwadi wùdi mwà kwikala mwomùmwè ne mwadi wà nzala to. Paùdi umòna maamù ne mwanèndè wa mu dibòko, ne kàyi mwà kwenda bu mùdiye mutàmbe kuteketa, ne mwànà mukesè awu ùpunga ne lufù, ne kafù kuulàkàne bwà nzala, mutèèlèje dishikunkila dyà ku mwoyi wà maamù awu adi, kumòna mwànà awu ne tutàmà twèndè tubùyike mu mùshindù wà tushààle ànu dikòbà dilamàte ku mifùbà, ne tuubinyàngànyàngà twèndè túbàlakana, ne kàyi mwà kupàtula dìyì, ànu ne lutàtù, twìsù twèndè tulònzòmòke. Kàkùtukù mwadi bu wà nzala ne nyòòtà to.

⁶⁹ Mu bipèèlà mwàmwà, búngì bwinè bwà bantu bàkaadi bafwàfwàfwe bwà nyòòtà’s wè! Maalu-malonda búngiwù’s, byà mémè mufwànyine kunùlama bufùkù bujimà, ne maalu-malonda malelèlà a mu cipèèlà. Mùshindù mwinè wùdibi ne paùdi upeta. . . upeta nyòòtà, mùdi dyabùlù ùkupèèsha màyi a— a bakishì’s. Nukàadi babimònèmòne mùneemu nànu, kabyena bìkèngela bwà nwnènu kuya ku Wesètè bwà kubimòna nànsha. Upweka ne njila, ne bìmwèka bu ne kùdi màyi panshi mu njila amu. Yònsò wa kunùdi ukààdikù mumòne aci, ukààdikù mwendèshe màshinyi ne mumatè mu cibeeba awu. Awu mmàyi a bakishì a mafi. Mwaba ewu kùkaadi cikondo kampànda, kùkaadi bidimu bitwè ku bisàtù anyi bìnaayi, mvwa mubalè mwaba wùvwà mabata kampànda, àbùuka ènda àkòsolola ditungà, kumònawù màyi a bakishì ne kupònawù mu njila amu, èla meeji ne àvwa àdyèla mu màyi. Ki kusùnsukawù ànu nàka, madikùme mu njila mùvwà mùme amu, èla meeji ne àvwa ikila mu màyi, màyi a bakishì’s.

⁷⁰ Misangu miinè búngiyi yidi dyabùlù mwenzèle bantu cintu cìmwècìmwè aci, mubàpèèshe màyi a mafi a bakishì, kamùyì cintu nànsha cìmwè muntwamu to, kàdi cidi ànu ndiitabuujja dyà budingìbudingì cyanàànà. Bantu bààbúngi leelù ewu bàdi bàpeta ntèndeleeleu wa budingìbudingì, bàteeta kukwàtakaja cintu kampànda anyi bàdicinkila ne kùdi cintu kampànda pàdibi kabiyi nàнку to! Bu mpandanjila mukàjì mukesè

ewu uvwa wamba ne ùvwa mwindile too ne pàvwàye mwà kutwishiibwa apu awu. Mbîmpè bwà twètù kwenza nàнку. Kwèna mwà kwalukila bwà kuteeta cyàkàbìdì to. Wèwè udi ne mpùngà umwèpelè, ne udi ne Dizòla adi, pa nàнку mbîmpè tùpwekè buludì too ne ku kiipàcilà aku.

⁷¹ Mwadi wà nzala, tèelejàayi, mmwadi munène bwalu mmwadi wà dikènga. Muntu awu ùdì ùpùnga ne lufù. Nènku, kaa, bu twètukù mwà kufika pa kaaba aku, bu ditunga edikù mwà kufikakù mu mùshindù wà diikàle ne nzala yà Nzambi's wè! Ndifwà dyà ne nzala dibì ditàmbe dikaadìku matùngà bu mùdì Inde udi munkacì mwà kufwà lwà nzala mu mubidi wàwà, edì ditùngà dyòdì dìdì munkacì mwà kufwà nzala mu nyumà. Kàdì paanyimà pàà wèwè mumanè kushàala ne nzala ntàntà mule, bìdì bifika mu mùshindù wà kùyi umanya ne udi ne nzala to.

⁷² Ànu mùdì kuuminyina ne mashìka. Paanyimà pàà wèwè muyè kule menemene, mwikàle uminyina ne mashìka, pashiishe paanyimà pàà katancì wèwè kuumvwa luuyà. Nènku paùdì wenza nàнку, ukàadi upùnga ne lufù! Nènku ki lutàtù lùdìku dilòlò edì ndwòlò alu. Èkèleeziyà mmikwàte mashìka mu mùshindù wà ne yìkaadi yùminyina ne mashìka kàdì yèla meeji ne yìdì ne luuyà, ku buumambàlà, kàdì pàayi miikàle yifwa mu nyumà. Báfwa! Kabàyi bàcimanya to. Ndekeelu wa byònsò, ùlàala panshì ùya mu tulù, ne ki cyònsò cidìku ncyòci aci. Kàciyi ùbìika kàbìdì to, bwalu mashì èndè mmuuminyine ne mashìka mu mijilu.

⁷³ Mpindyewu, kwikala ne nyòòtà. Yesù wàkamba ne: “Mashi Àanyi ncyàkunwà cyà bushùwà.” Wèwè ne nzala yà Mwoyi, ne nzala yà Mwoyi, Yesù ngudi ne màyi àmwèpelè àdì mwà kumana nyòòtà ayi. “Lwàyi kÙndì, nwènù bònsò bàdì bàkwàta mudimu mukolè ne bambùle majitu.” Mu Bwàkabuulwibwà, mbambè ne: “Ewu udi ne nyòòtà àlwe ku mpokolo yà màyi a Mwoyi bwà kunwà kàyi ùfuta to.” Wèwè ne nyòòtà yà Mwoyi!

⁷⁴ Tudi tumòna ne balongi bàà mabùlungà a muulu bàdì bàdyànjila kwamba ne, dǐngà ditùkù mu citùpà cyà mbangilu eci anyì citùpà cyà kumpàlà cyà ngondo, kubangila mu matùkù a ngondo àbìdì anyì àtaanu, anyì ditùkù kampànda dyà ngondo ewu, balongi bàà mabùlungà a muulu bàà ba-Indiens bàdì badyànjila kwamba ne buloba nebùtaayikè bùshaalè tuinguvingu. Kàdì bibèjibeji byà beena Àmèrikè bìdì bìcìseka. Mémè ncyèna ngiitabuja ne buloba nebùtaayikè bùshaalè tuinguvingu nànsha, kàdì ndi ngamba nshindika ne mbibì bwà kucìseka. Bwalu, cintu kampànda cidì pabwìpì ne kwenzeka dimwè dyà ku matùkù àdì panshì aa, cintu cifwànàngàne ne cyòci aci, pàabwelà mabùlungà àtaanu aa, Mars, Jupiter ne Venus, ne—ne bikwàbò, mu byàbò—byàbò. . . Kacya kaàtukù macyènzè to. Kaa, bàdì bàmba ne pàmwàpa kùkaadi bidimu

binunu makùmi àbìdì ne bitaanu, kàdi nganyi mwinè uvwaku bwà kucimanya?

⁷⁵ Ndi ndyànjila kwamba ne eci cidi ne ngangàcilù wa mu nyumà. Mémè ndi ngiitabuuja ne ndibwela dyà mu cyalu dyà didileeja dyà Nzambi, bwà ne mabuulula manènè a Dìyì neàkangudiibwè munda mwà cikondo eci. Vùlukàayi ne, bàdi bamba ne mitootò yisàtù nyàakabwelà mu bijèngù byàyi pààkalediibwà Yesù. Kàdi eyi nyitaanu, ne itaanu nngàsà, nombà wa ngàsà. Isàtù nnombà wa bupwàngàne. Itaanu nnombà wa ngàsà, J-e-s-u-s, n-g-â-s-à, f-a-i-t-h diitabuuja, ne bikwàbò. Nombà wa ngàsà! Nzambi Yèyè ùtùmakù bukole Bwendè kùdì èkèleeziyà, neciikalè ngàsà Wendè, kacýàkwikala ne mbwà ditùmikila dyà cisamba nànsha. Ne Yeshàayi mmwambè, mu nshapità wa 40, mwà “kwela Yelusàlèmà lubilà ne, mvità yèndè yàkajika,” kàdi pèndè’s ùvwa mupiile bwà dikuukwila dyà mpìngù, kàdi cívwa nngàsà wa Nzambi uvwa umutùminaci awu. Nzambi Yèyè ùtùtùmina cintu kanà cyònsò eci, neciikalè ngàsà Wendè kàdi kaciyi dikùmbanyina dyètù to. Pa nànkù, cidi mwà kuumvwija cintu kampànda. Ndi mémè ndyànjila kwamba ne nekwikalè dishintuluka. Ncyèna mumanyè ciikalàci to, kàdi ndi ngiitabuuja ne cidi pabwìpì ne kwenzeka. Tudi pa . . . ànu mu mulààdilu wàci mpindyewu.

⁷⁶ Kàdi muntu yèyè ne nzala, àlwe kùdì Kilistò. Muntu yèyè ne nyòòtà, àlwe kùdì Kilistò. Yèyè ngudi umana nyòòtà. Yèyè ngudi Mujikiji wa nyòòtà yètù yònsò ne nzala.

⁷⁷ Mwua ne kaabwalu kampànda kàtùbo bandondèle kùkaadi cikondo kampànda. Ndi mufwanyine kwikala mukàlondè mu èkèleeziyà ewu. Pàngiikalà mukàlondè, nùmfwilèku luse bwà dikàmbulula ànu bwà kulenga tuntu atu. Kùvwa mulombodi kampànda wa ba-Indiens, anyi, mutàngidi wa mùshindù kampànda wa ba-Indiens. Ùvwa ùkòsolwela mu citùpà cyà buloba cyà Navajo, nènku, kujìminayè. Dyèndè ùvwa n’Coy. Nènku ùvwa ùpweka ne kajila, kajila kàà nyama ya mwitu, ki kudyàmbidilayè ne: “Mpindyewu, mémè mulondè kajila aka, ncyà bushùwà ne nèmpetè màyi.” Kàdi kabalù kèndè kàvwa ne nyòòtà mu mùshindù wà ne kàkaavwa ne ludimi lupàtula pambèlu, lùme, mimpèmpè milwè mikünze ne myumìnyine ne lùsenga. Ùvwa mulamè mùshwalà wèndè kwisù mu bipeepèlè bikolè byà nsenga abi mu mùshindù wà ne wùkaavwa muumìnyine, ne yèyè ùkaavwa ùfwa, bwà kupanga màyi. Nènku ùvwa ùlombola kabalù kèndè aku pèndè ùmba ùfika mu kajila aku. Ki yèyè ne, pààkabàndàye pa kabalù aku yèyè kumòna kajila kàà nyama yà mwitu aku, kwambayè ne: “Ncyà bushùwà ne nekàkamfikishè ku màyi.” Ki kutùpikayè cibelu eku cibelu eku pa kabalù kèndè aku e kubangayè kupweka ne kajila aku.

⁷⁸ Ne kabalù kàvwa pààkù kamanyè ne kàvwa mu kajila kàà màyi. Mùshindù mwinè wùdì Nzambi ùpèèsha nyama yidì tumàmà ayi disakiibwa’s! Ki kòkò kàdì kàpwekà ne kajila

kàka. Ndekeelu wa byònsò, ndambù kukùdimukila ku luseke kampànda, ànu ndambù mukesè ku kajila katuuta aku. Kabalù kàkaavwa kaswè kukùdimukila ku luseke alu, kàdi Coy ùvwa ne meeji mashìlàngàne. Kuteetayè bwà kukàlama mu kajila kanènè kàà kalongolola aku, ki kubangayè kupweka kàdi kabalù kakàyi kaswè kuya to. Yèyè kukàsalula, kàdi kòkò kudila ne kubangakù kulonda njila mukwàbò. Ki kubangakù kukàdamana. Kàvwa katekète bikolè kapangè bukolè bwà kumwimansha.

⁷⁹ Ki kubangayè kukòka bikànù byà ku bisàbaatà, mu mùshindù wà ne wàkatàpa ne kabalù aku mpùtá, mutámbe kwambulukila kuulu bwà kuya kapeta màyi, mwoyi wèndè wùvwa mufwànyine kupànda, mu mùshindù wà ne kabalù kààkiimana, kàzakalala, kàtùuka mashi. Ki kutàngilayè panshi, kutàngilayè panshi mwaba awu, ne kòkò kàvwa kàzakala mùshindù ewu ne kàmba kudishinda mwinshì mwèndè amu. Yèyè kukàtàngila, e kumònayè mashi mu luseke lwàkù amu. Yèyè ùvwa mwena Kilistò. Ki kwambilayè kabalù kèndè aku, yèyè ne: “Ntu misangu yàbùngi ànu muumvwè ne yà mwitu. . . anyi, nyama yìvwa ne disàkiibwa kampànda. Kabyèna bìmwèka bu ne musùmbà mukesè wùvwa mukùdimùkile kwàka awu wùvwa mufwànyine kuya ku màyi to. Mbimwèke bu ne kajila kanène aka nkafwànyine kulombola kutùyi yiya dîbà dyònsò ku màyi, kàdi,” yèyè ne, “wèwè pawikalà mungambùle ne lulamatu too ne apa, néndondè disàkiibwa dyèbè adi.”

⁸⁰ Kaa, mùshindù mwinè wùndì ndyàmbidila ciinè aci bwà Kilistò's wè! Njila uyààya ku kabùtù mmwashila makunji ne mulongolola njila mujimà, kàdi kùdi njila mubùmbàkàne udi ufila ku Mwoyi. Nekwikalè ànu bakesè bààWùpetà. Kàdi, kaciyi disàkiibwa to, kàdi Nyumà Mwímpè ngwàkukùdimuna ku luseke ne kukutùma ku màyi a Mwoyi awu. Ndi mèmè ngeela meeji ne, Yèyè ngudi mumfikishe too ne pánkaadi apa, nèmMwangàtè too ne ku ndekeelu kwà njila.

⁸¹ Bwà kujikija bwalu abu, kàà—kàakayakù ntàntà wa citùpa cyà kilòmèètà to, mu mùshindù wà ne, dyàkàmwè, kabalù kàà lulamatu aku kàakadyèla mu ciinà cinènè cyà màyi. Kabalù kàvwa kamanyè cìvwàku kàmba, cìvwàku kaswè kwamba mu mùshindù wàkù wà dyambila uwwa mukàbànde awu. Kubwelayè muntwamu. Kwambayè ne wàkakùpa màyi mu dyùlù dyà kabalù aku. Wàkoowa màyi pambidi, yèyè kwela mbilà mikolè ne mikunda, ne ùvwa wèla mbilà ne dīyì dinàngula, ne ùdipòngolwela màyi pa muminu, wèla mbilà mikolè ne: “Twasùngidiibu! Twasùngidiibu! Twasùngidiibu!” Ki kabalù aku, munkacì mwà kunwà màyi, kàzakalala. Ki kutàngilayè nseke yà kabalù yìvwa yitùuka mashi ayi, yònsò ayi dîbà adi mikèba kùdi byamù byà ku bisàbaatà abi.

⁸² Ki kwambayè ne ànu pa dîbà adi, yèyè kwamba. . . kuumvwa muntu wàmba ne: “Pàtukàayi mu màyi amu.” Ki kutàngilayè,

nènku kùvwa kwimanè mwaba awuè mulami mukesè wa ngombe ne kwísù kunyangükàngane kwónsò. Ki kupàtùkayè mu mâyi amu. Kwambayè ne wàkumvwa mupùùyà wà mudilu, ne kutàngilayè eku ne eku, nènku kùvwa musùmbà wà bantu baasè citùùdilu mwaba awu. Bàvwa balwè mu lwendu lwà bukèbikebi. Bàvwa bapetè ngòlò, kàdi mu njila wa dyalukila bàvwa ne tubalù twàbò ne bambwishe tubalù majitu, kàdi kufikabò too ne ku ciinà cyà mâyi eci ne bàvwa biikishe, ne bônso bakwàcike maalà.

⁸³ Ne kwambayè ne bàvwa benzè cikukù cyà munyìnyì wà kashà, ne kudyàye naabò. Ki yèyè ne, umwe wa kùdìbo kwambayè ne: “Nwàku maalà.” Kubàmbilayè ne yèyè ùvwa nganyi, ùvwa Jack Coy, mulombodi wa ba-Indiens. Ki awu ne: “Èè, mpindyewu, nwàku maalà.”

Yèyè ne: “To,” yèyè ne, “mémè ncìtu nnwà maalà to.”

⁸⁴ Nènku aci’s ncyenzè ànu bu cipendu bwà bantu abu. Ki yèyè ne: “Wèwè’s neùnwe maalà a kutùdi twètù!”

Yèyè ne: “To, mémè ncìtu nnwà maalà to.”

⁸⁵ Ki kwelayè kalòndò aku muulu, yèyè ne: “Angàtà maalà ùnwe!” Bakwàcike maalà, bóbò bônso, nudi bamanyè’s, bantu batwè ku bàsambòmbò.

Nènku ki yèyè ne: “Twasàkidilaayi, balùmyàna.”

⁸⁶ Yèyè ne: “Munyìnyì wètù wà kashà ewu ní mmwìmpèku bwà kudyà, maalà ètù a wiskì mmìmpè makùmbàne dinwà.”

⁸⁷ Kàdi’s nudi bamanyè mùtùbo, bakwàcike maalà. Ki yèyè ne: “To,” mwàkambàye.

⁸⁸ Ki kwelabò mutèlèngè mu cingoma, kwambabò ne: “Bwà mpindyewu kaayi, anyi unwànwa anyi mbùngà bwalu!”

⁸⁹ Yèyè ne: “To. To, ncyàkunwà to.” Ki awu kubangayè kuludikila cingoma aci. Yèyè ne: “Anjì indilà.” Yèyè ne: “Ncyèna ne bwòwà bwà kufwà to.” Yèyè ne: “Ncyèna—ncyèna ne bwòwà bwà kufwà to.” Yèyè ne: “Kàdi ndi—ndi muswè nnùlondèlèku bwalu bwànyì ebu kumpalà kwà mémè kufwà, cìdi cyènza ne nciikadi nnwà maalà.” Yèyè ne: “Ndi mwena Kentucky.” Yèyè ne: “Ne mu kazùbù kakesè kàà kale kàà micì mu dindà kampànda, mùvwà maamù mulàadika ùpunga ne lufù, wàkambiikidila ku luseke lwà bulàalù bwèndè, ne kwambayè ne: ‘Jack, tatwèbè wàkafwà ne dibùkì dyà twartà mu cyanza, ku mèèsà, mukwàcike.’ Ki yèyè ne: ‘Kùnukù maalà to, Jack wanyì, cyùdi wenza nànsha ciikàle cinyì.’” Ki yèyè ne: “Ki mémè kutenteka byanza byànyì pa mpalà wa maàmù wanyì awu. Nènku mémè kulaya Nzambi, mwikàle kànà kakesè kàà balùmè kàà bidimu dikùmi, ncìvwakù mwà kunwà maalà àànyì a ntwàdijilu to.” Yèyè ne: “Kacya ncitukù muànwe nànsha.” Ki yèyè ne: “Mpindyewu wèwè muswè kungaasa cingoma, ngaasàaku.”

⁹⁰ Nènkù pàakajuulà muntu mukwàcike awu cingoma cyèndè ne kalòndò aku muulu cyàkàbidì, kwambayè ne: “Nwà maalà aa cyanàànà ndi nkwasà!” Kàdi ànu apu cingoma cyumba cîteema ne kalòndò aku kumba kàtaayika.

⁹¹ Ku luseke lwà lupòngò aku kùvwa kwimàne mulami mukesè wa ngombe, wa kwisù kunyangùkàngàne, ne binsònjì bimupwekela pa matàmà. Yèyè ne: “Jack, ndi pàanyi wa ku Kentucky. Ngàkenzela mààmù kampànda mulayi dingingà ditùkù, kàdi mèmè kushipa mulayi wànyi awu.” Yèyè ne: “Mvwa mwindile bwà balumyànà aba bàkwacikè bîmpè, nènkù mvwa ne cyà kubàshipa musumbà mujimà ewu, nànsha bìshi, kwangata ngòlò yònsò uvwabò nendè awu.” Yèyè ne: “Kàdi nkàadi mukwàcikèkwàcike maalà ne mwenzènze bibì. Kàdi,” yèyè ne, “ndi mutwishìibwe ne pàdi mwadi wà cingoma cyànyi mubànde mupicile mu mpòngò yà Dyulu apu, mààmù ùmvù ne ngàdicipi ne ncyàdyàkuànwakù kàbidì to.” Kì mwaba awu, ku ngàsà wa Nzambì, kulombolayè bantu bònsò abu kùdi Kilistò, bònsò abu kuntwaku.

⁹² Nwamònu’s, kùdi cintu kampànda pa bwalu bwà màyi, cintu kampànda bwà cyashima. Bwalu bwànyi bùvwa ne, kufika ku màyi paùdi ne nyòòtà. Kùdi cintu kampànda cidici cikwenzela, nkufika ku màyi paùdi ne nyòòtà.

⁹³ Mpindyewu, Yèyè wàkamba ne: “Ndi nnùshìlla ditalala Dyànyi. Ndi nnùpèèsha ditalala Dyànyi.” Kì mmùdi bàà pa buloba bànùpèèsha ditalala amu to, kàdi mùshindù wùdiYe Yèyè ùnùpèèsha ditalala. Ditalala Dyèndè ndidì dìmanà nyòòtà yètù. Twètù tujinga ditalala, dìbà adi tùpetàayi cyashima mu ditalala Dyèndè, bwà kumanya ne tudi mu ditalala ne Nzambì ku Mukalenge wetù Yesù Kilistò. Yèyè ki wetù Mufidi wa ditalala udi umana nyòòtà yètù.

⁹⁴ Mvensà udi wamba ne Yèyè ùdi Cyàkudyà cyà bushùwà ne Cyàkunwà cyà bushùwà awu. Ndi ne kaacimanyinu kakesè mwab’ewu, mvensà wa 57 awu ne: “Cyàkudyà cyà bushùwà ne Cyàkunwà cyà bushùwà.” Tèèlejàayi cyàkambàYe apa.

Nènkù bu mùdi Taatù udi ne mwoyi muntùme, ne bu mùndi ne mwoyi ku Taatù Wanyì, pa nànkù ewu udi undyà mèmè, byà mwomùmwe yèyè neikalè ne mwoyi ku mèmè.

⁹⁵ Mu ngaakwilù mukwàbò ne: “Taatù mmuNtùme, ne Mèmè ndi ne mwoyi kùdiYe. Ne muntu yònsò udi ulwa kùdi Kilistò ùdi ne cyà kwikadila ne mwoyi ku Kilistò.” Kaa, ekèlekèle, s’ki bwalu mbwòbù abu, ki kòòmunyò nyèyè awu. Kì kòòmunyò mulelèlè wùdi upeta paùdi ne mwoyi ku Kilistò nyèyè awu.

⁹⁶ Mpindyewu, mibidi yètù yìdi dijinga ne cyàkudyà ne cyàkunwà ditùkù dyònsò, bwà kushàala ne mwoyi, mubidi wètù wà musunya ewu. Twètù katùyi tudyà cyàkudyà ditùkù dyònsò ne tunwà cyàkunwà to, dìbà adi mubidi wètù wùdi wùteketa.

Kùdi cintu kampànda munda mwètù cìdi cyènza ne tudi ne cyà kudyà cyàkudyà. Cyàkudyà cyà ditùkù dimwè kacyàkushàalakù too ne ku ditùkù didi dilondà to. Bìdi bikèngela wikalè udyà ditùkù dyònsò, bwa kukolesha muntu webè wa cifwàkà awu. Udi mwà kutungunuka ne kwikala ne mwoyi, kàdi udi wenda uteketa. Nènku ditùkù diibìdi, udi uteketa bitàmbidìle. Ne ditùkù diisàtù, udi wenda ushàala ne butekètè bwà dikèma.

⁹⁷ Èè, ki cyòci aci citùdi misangu yàbùngì twenza mu cipaapu cyà nyumà. Nudi numòna's, ditùkù dyònsò dìcyacyà dīlīlīlā edi bikèngela twikalè tuyiikilangana ne Kilistò. Bikèngela twakulè Nendè ku ditùkù ne ku ditùkù. Bikèngela tulongolanganè Nendè ditùkù dyònsò. Pòlò wàkamba ne: “Ndi mfwà ditùkù dyònsò.” Nwamònu anyi? “Ditùkù dyònsò, ndi mfwà, kàdi ndi ne mwoyi, kī mmémè to kàdi n’Kilistò udi ne mwoyi munda mwànyì.” Pa nàнку, piikalà mubidi wèbè wà musunya awu ne cyàkudyà ditùkù dyònsò ne kunwà ditùkù dyònsò, bwà kushàalawù ne mwoyi, mubidi wèbè wà nyumà awu wùdi wùkèngela Cyàkudyà cyà nyumà ne kòòmnyò ne Mukalenge ditùkù dyònsò, bwà kushàala ne mwoyi. Eyowà. Yesù wàkamba ne: “Muntu kààkwikala ne mwoyi ànu ku dyàmpà nkààyaadi to, kàdi ku Dīyì dyònsò didi dipàtukà mukana mwà Nzambi.” Pa nàнку, ditùkù dyònsò tudi ne cyà kulonga Bible. Bàmwè bantu kabàtu bàMulongakù to nànsha kakesè. Bàmwè batu bàMwambula misangu yìbìdi ànyì yisàtù ku cidimu. Kàdi, mwena kwitabuuja mulelèlè, wa menemene udi mwibàkiibwe mu nyumà bulelèlè, ùdi ùbala Bible wendè ditùkù dyònsò, ne ùdi wàkula ne Mukalenge. Ncyà bushùwà. [Katùpà kàà mukàbà wà mēyì munda mutupù—Muf.] Ûdi ne cyà kwenza nàнку. “Muntu kààkwikala ne mwoyi ànu ku dyàmpà nkààyaadi to, kàdi ku Dīyì dyònsò didi dipàtukà mukana mwà Nzambi.”

⁹⁸ Mpindyewu, cikwàbò cintu citùdi tudīila cyàkudyà, mbwà kwibaka mubidi wètù bwà kukàndameenawù màsaamà. Wèwè kùyi udyà cyàkudyà to, mwikàle ulekela mubidi wèbè wènda wùteketa, dībà adi wùdi wùshàala ku bukòokeshi bwà màsaamà. Màsaamà neàbwele buludi mu musùlù wà mashi, kàdi ki wèwè wāyi awu. Mashi èbè òwò kāyi mabanjike ne makezùke to, èè, dībà adi, disaamà nedibwele buludi mu musùlù wèbè wà mashi. Pa nàнку bikèngela wikalè udyà byàkudyà bīmpè bìdi bìdiisha mubidi bwà kulama musùlù wèbè wà mashi bīmpè. Wèwè kùyi wenza nàнку to, wèwè kwèna wakamangana ne màsaamà to. Ki lutàtù lùdì naalù beena Kilistò bààbùngì ndwòlò alu.

⁹⁹ Bu mùdì micì mikoleshila mu nzùbu wa luuyà. Nudi bamanyè's, angàtà mucì mukoleshila mu nzùbu wa luuyà, bikèngela kuwèngeleka. Wòwò kī mmumanyè mùdì kuulu kùmwèka to. Kī mmumanyè muunya wà dībà ne bikwàbò to, wùwva wòwò ànu mubwikila ne mwengeleka. Nènku ki lutàtù lùdiku ne beena Kilistò bààbùngì menemene bàà ku dīnà, mmicì yà mu nzùbu wa luuyà. Ncyà bushùwà, wòwò

wùdi ku bukòòkeshi bwà cìshiishì cyònsò cìlwalwà aci! Nudi bamanyè, ànu mi—mi. . . Ànu micì yà—yà mifwebèlèle ki yìdi yìkèngela kwikala kuyìpwidijila manga, anyì, micì yà mamiinu masopakaja.

¹⁰⁰ Nudi bamanyè's, angàtà ngombe wa kale wa Hereford ùmulekèlèlè mu mpàtà mwàmwa, kàdi ùlekelelèmu ngombe wa nsèngù mile, ngombe wa nsèngù mile awu ùdi mwà kudimanyina mwà kupita bwalu nyama mumuna wa ku muji. Kàdi angàtà wa Brangus anyì wa Hereford musambakaja anyì wa dimiinu disopakaja, nngombe mutàmbe bulenga wa dibandila, cyà bushùwà, mutàmbe kwikala ùnyenya maanyì ne mubidi tumatuma, kàdi ùyilekèlèlè muntwamu, kayèèna mwà kudimanyina njila to. Neyifwe! Bikèngela kwikalabo bàyèngeleka. Nwamònu anyì?

¹⁰¹ Nèngu ki lutàtù lùdiku leelù ewu ndwòlò alu, tudi ne beena Kilistò ne mvwàdilu mutàmbe bwìmpè, èkèleeziyà mitàmbe bunène, ne dilonga dyà—dyà tulaasà búngì cyanààna, tèlòlòjì ne tuyaayi, kàdi bikèngela kubèngelekabò misangu yònsò, bikèngela nùkenketelè mu twàbò tulòndò bwà cyanààna kwèna umòna to nànsha kakesè. Cìdi citùkèngelà mbeena Kilistò bàà dimiinu dyà cyà bushùwà, baledùbwe mwìnshì mwà Mashi a Mukalenge Yesù, bàdi kabàyi ne mwoyi ku tèlòlòjì wa èkèleeziyà to, kàdi ku Dìyì dyà Nzambi, kòòmunyò ne Kilistò. Dìyì dibwela munda mwà mwena kwitabuuja, mubidi wèndè—wèndè wà nyumà mmwàbàkùbwe. Kì mmwàna mukoleshila mu nzùbù wa luuyà to!

¹⁰² Kùvwa mwambi kampànda uvwa wamba leelù ewu, mvwa mumuumvwè, ucyàmba ku tudyòmbà, kwambayè ne, pààkabwelàye mu ditùnga edi, ùvwa ne disaamà dinènè dyà mutù wà kapàla, ne bàvwa bààkula bwà dimupanda. Ne bàvwa bàmba ne nebènzè *cikampànda* ne *cikansanga*, ne bàkose cintu ne bàmupandè, ne bùùmushè katùpà kàà kajilu kàà munda mwà mimpèmpè, cìvwà mwà kwenza ne mpàlà wèndè àbuyikè, ne bikwàbò byà mùshindù awu. Ne kwambayè ne ùvwa munwè ntuku mijimà yà tumuma twà bwanga. Byenzè bu ne kùvwa tumuma twà bwanga búngì cyanààna tùvwàye ne cyà kwangata. Kàdi pààkafikàye kùdi ngàngàbukà mwìmpè mwena Kilistò, ngàngàbukà awu kwambayè ne: “Twànji tùpwe mwoyi byà tumuma ne tùpwe mwoyi byà dikupanda abi, ne twibakè mubidi bwà wàmònakù mwà kukàndameena mutù wà kapàla awu.” Ki cyòci aci's!

¹⁰³ Ncinyì cìdi cyènza bwà bantu kabàyi mwà kulààla pànu mùvwàbo bàlààla kwònsò eku? Bikèngela tùtwibwè cisàlù bwà *cikampànda* ne lushìngì bwà *cikansanga*, ne tudìpwidijila manga a mìshindù yònsò. Bìdi byènza cinyì? Bìdi bituvwija batekètàngàne, ne mafutàfutà, bafwatàlale, katùyikù bìmpè to. Pàvwàbi ne bantu bàà kale wàwa. . . Mòna's, tukàadi ne mibidi

kayiyi yipetangana ne cintu kanà cyònsò. Mpindyewu bàkaadi ne dibèngangana didi kadiyi mu dyòdi to ne bikwàbò byònsò.

104 Mvwa nsanganyibwa mu Àfrikè, ncìyikù mwà kutwibwa cisàlù bwà màlèyalèya to. Kàdi bu kamwe kàà màlèyalèya kangiikile pa cyanza, s'mvwa mufwànyine kupeta màlèyalèya. Katwèna tùdila mwadi to, ne wèwè kwèna nànsha umanyakù to. Tùdi twikila, tùtùngunuka ànu ne kukwikila, kwàjikì, waàpeci. Wèwè mutùngùnùke ne kwikala ne mwoyi, newikalè naawù munda mwà bidimu dikùmi ne bitaanu. Ne pashiishe misangu mikwàbò neufwe dísàamà adi. Nènku kùvwa beena kalaba abu mu tuzùbù twàbò tukesè, ne tumwe pa mikòlò yàbò pònsò apu, biikàle butakà. Tumwe twikàle túbàsùma, tumwe twà màlèyalèya, kàdi kabiyikù bibàtàcisha to. Bwà cinyi? Bàkaavwa bapetè cisàlù. Bàvwa batwibwe cisàlù cyà kùdi Nzambi.

105 Nènku ki lutàtù lùdìku ne bantu leelù ewu ndwòlò alu. Ki lutàtù lùdìku ne èkèleeziyà ndwòlò alu. Tudi batàmbe kupeta nshìngì yà ku bwànà ne tèlòjì mukwàtakaja kùdi bantu, mu mùshindù wà ne tudi bapwidijila manga. Cidì cìtùkèngelà nditwibwà dyà cisàlù cyà Nzambi dyà kùdi Dìyi dya Mukalenge Nzambi. Muntu neikalè ne mwoyi ku ditùkù ne ku ditùkù ku Cyàkudyà cyà mùshindù awu, bwà kwibaka musùukà wèndè mu ditwibwà dyà cisàlù ku màsaamà a nyumà àdi àtuuta nkòkà ne àtupikà mu ditùngà dijimà emu. Ndi ne tuntu bùngì cyanààna tufùnda pa bwalu ebu, kàdi nebikengelè bwà ngiimanyikè.

106 Mpindyewu, dibàkaayi, dilongòlòlaayi bwà ditwibwà dyà cisàlù. Mpindyewu, tudi ne mwoyi ku cyòci eci, mibidi yètù—yètù yidi ne cyà kwikala ne cyòci eci. Nènku, twètù katùyi naaci to tudi díbà adi bazànjika ku màsaamà a mishindù yònsò. Nènku Dìyi dyà Nzambi, patùdi tuDìitabuuja ne tuDìitaba ku kòomunyò ne: “Mukalenge, Dìyi Dyèndè didi Bulelèlà.”

107 “Wanyi èkèleeziyà ùdi wàmba ne kabyèna bikèngela bwà wèwè kulediibwa cyàkàbìdi to. Bòbò bàdi bàmba ne: ‘Kulabulangana ku cyanza ki kulediibwa kwa cyàkàbìdi.’ Bàdi bàmba ne: ‘Dimyaminangana dyà màyi.’ Bàdi bàmba bintu bikwàbò byònsò ebi ne: ‘Ki cyòci aci, Taatù, Mwànà ne Nyumà Mwimpè.’” Kàdi Bible’s mmwambè bwà kubàtijiibwa mu Dìna dyà Yesù Kilistò. Nwamònu anyi? Mpindyewu, ndà kumpàla ne ditwibwà dyà nshìngì dikwàtakaja adi pawikalà muswè, neùdivwijè wèwè mwinè mwena Kilistò mukwàtakaja. Nwamònu anyi? Kí ng’aci cidì cìkukèngelà to.

108 Kwèna mwà kupeta Mwoyi to, ànu mupìcile kùdi Kilistò. Nènku mpindyewu cidì Dìyi Dyèndè dyènta ncinyi? Dyòdi ndidì diibakà mubidi wètù wà nyumà, wà dikàndà, patùdi tuyiikilangana Nendè, bwà kukàndameena dyabùlù.

109 Wèwè udi wamba ne: “Mwanètù Branham, aci cyùdi wamba ncinyi ne, ‘kuyiikilangana mu Dìyi Dyèndè?’”

¹¹⁰ Èyowà, Yèyè ùdi Dìyì. “Ku cibangidilu kwàkadi Dìyì, ne Dìyì dyàkadi ne Nzambì, ne Dìyì dyàkadi Nzambì. Ne Dìyì dyàkavwijiibwa mubidi ne dyàkasombela munkaci mwètù.” Ne twètù bikèngela tùdye mubidi Wèndè. Dìbà adi mubidi Wèndè n’Dìyì Dyèndè, bwalu Yèyè ùdi Dìyì. Ne Yèyè mmwambè, mu Yone munsantu 15 ne: “Nwènù bashààle munda Mwànyì, ne kòòmuniyò Wanyì, Dìyì Dyànyì, dishààle munda mwènù, dìbà adi nudi mwà kulòmba cinùdi baswè ne nebànwènzèlèci.” Ki bwalu mbwòbù abu’s. Aci ncilelèlà. Nwamònu’s, nùlombè cinùdi baswè!

¹¹¹ Cyùdi wenza ncinyi? Udi munkaci mwà kwibaka mubidi wèbè too ne ku ditwìbwà dyà cisàlù ku. . . Muntu kampàndà ùbwela wàmba ne: “Kaa, wetù èkèleeziyà kàtu wìtabuuja dyela dyà mbilà to.” Wamònu’s, udi mwibakiibwe. Cinyi? Udi ne kòòmuniyò munda mwèbè, Dìyì adi. Ne wèwè udi mutwìbwe cisàlù ku cyòci aci. Mushiki wà lukutukutu wówò mubwelèmu, ncinyi aci? Kawèna ne Dìyì nànsha òmwè mu wówò to, dìbà adi wèwè udi mutwìshìibwe ne ngwà mafi. Nànsha ciikàle cìmwèka cilelèlà bìshi, cyòci kaciyi Dìyì to cilekèlè. Cyà bushùwà, cilekèlè. Nànsha cyòci cyènza cinyi, cidi ne cyà kukùmbanangana ne Dìyì!

¹¹² Mu disambila, pâmvwà ntèèla Miikà mwimàne mwaba awu, tàngilàayi, bìvwa bimwèka ànu byà cyà bushùwà menemene, pàvwà Izàlèlèlà mwaba awu apu, ne citùpà cyà buloba aci ciikàle cyàbò bòbò. Beenyi abu bàvwa babwelè ne babànyèngeci ne biibàkemù nzùbù yàbò bòbò, ne bàkaavwa basòmbèle mu citùpà cyà buloba cìvwà Nzambì mubàpèèshe. Pa nànkù bìvwa bimwèke ànu bu ne baprófetà nkàmà yìnaayi bàà beena Ebèlù abu bàvwa babingè’s. Kàdi, nudi bamanyè’s, kùvwa cintu kampàndà cìvwà kùdi Yèhoshàfàtà ciikàle cyà nyumà, kwambayè ne: “Kwènàku ne mukwàbò anyi?”

¹¹³ Yèyè ne: “Ndi ne mukwàbò, kàdi,” yèyè ne, “ntu mumukìne. Cintu cìmwèpelè cìdiye yèyè wènza cidi ànu kwamba biprófetà bibi.”

Yèyè ne: “Ndàayi nùkamwangatèbi tumutèlèjè.”

¹¹⁴ Ki kubàndayè, yèyè ne: “Ndàaku, ndàaku kuntwaku, kàdi ndi mumòne Izàlèlèlà mutangàlàke bu mikòòkò kayiyi ne mulami.” Ki pashìishe yèyè kulonda cikèènà-kumònà cyèndè aci.

¹¹⁵ Mpindyewu, udi mubingè nganyi? S’bìvwa bimwèke ànu bu ne nkàmà yìnaayi ayi yìvwa mibingè’s. Bantu nkàmà yìnaayi balongesha bimpè, bàmba ne: “Ndàaku, Mukalenge ùdi neebè.” Ne nànsha Zedèkiyà mwinè ùvwa ne—ne—ne—ùvwa ne. . . Zedèkiyà ùvwa ne nsèngù minène yìbidi yà cyamù yìvwàye mwenzè. Yèyè ne: “Ne yòyi eyi neusakè beenyi abu too ne pambèlù pàà buloba.” Ùvwa mutwìshìibwe ne ùvwa mubingè.

Ûvwa mumanyè ne ùvwa mubingè. Kàdi, nudi numòna's, ùvwa mupiile.

116 Nènku kaaba aka, Miikà, umwe ùbèngangana ne nkàmà yinaayi, ki yèyè ne: “Wèwè muyè, Izalèèlà neátangalajiibwè, kabàyi ne mulami to.”

117 Kàdi bakwàbò abu bàvwa bàmba ne: “Ndàaku, Mukalenge udi neebè!” Mpindyewu, mu mubidi emu, bàvwa babingè, mwaba awu wùvwa wà Izalèèlà. Kàdi Dìyi dyà Mukalenge dikaavwa dipiishe Aakàbà, nènku mmunyi mùvwàku Nzambì mufwànyine kubènesha civwàYe mupiishe aci?

118 S'ki cyòci aci leelù ewu. Nwamònu anyi? Dìyi dyà kòòmuniyò divwa mu Miikà. Mpindyewu, pawikalà uyiikilangana ne Nzambì mu dyangata dyà kòòmuniyò mulelèlà, kàdi nyumà munda mwèbè ùbèngangana ne Dìyi edi, kwèna munkaci mwà kuyiikilangana ne Nzambì to, udi uyiikilangana ne baadémons. Kàdi bóbò bàdi bàtentula bibi be! Bible mmwambè ne: “Mu matùkù a ndekeelu nebàseeswishè ne Basungula mene bu ne bìvwa mwà kwenzeka. Kàdi mau lu ne buloba nebijiminè, kàdi Dìyi Dyànyì kadyàkujiminakù to.” Nènku piikalà. . . Pólò mmwambè, mu Galàtiyà 1.8 ne: “Mwanjèlò wa mu dyulu yèyè muiyishè èvànjeeliyò mukwàbò nànsha wa bishi mushiilàngàne ne Ewu unùkaadi bamanè kutèeleja, èdiibwè mulawu.” Nànsha mene mwanjèlò! Mu èkèleeziyà wa ku cibangidilu, pàvwà bantu abu, mùdi Martin Munsantu, Irénée, bantu bàà difwàna dyà Nzambì abu, pàvwà dyabùlù ùmwènèka bu mwanjèlò wa bukènkè. Kàdi, nwikalàayi batàbàle, yèyè neikalè museesùke ndambù ku Dìyi.

119 Wàkamwènèkela Evà bu mwanjèlò wa bukènkè, kumwambilayè ne: “Bushùwà, Mukalenge mmwambè *cikampànda*, Mukalenge mmwambè *cikansanga*,” kàdi yèyè wàkabèngangana ne Nzambì ku ndekeelu mene. Ne ki mùshindù wùdi kòòmuniyò wa mashimi wènza leelù ewu nàнку. Pàdi bantu bèèla meeji ne bàdi bàsambila Nzambì, kàdi kabàyi baswè kutùmikila Dìyi to, awu nkòòmuniyò wa mashimi.

120 “Nwènù bashààle munda Mwànyì, ne Dìyi Dyànyì munda mwènù, díbà adi nùlombè cinùdi baswè,” nwamònu's, “ne necyènjiibwè.” Mpindyewu, kaciyèna mwà kukùmbanangana musangu wùmwè, pashiishe kubènga kukùmbanangana musangu wùdi wùlondà to. “Nwènù bashààle munda Mwànyì, Mèyi Àanyì mashààle munda mwènù,” mbwena kwamba ne, kushààla mwaba awu. *Kushààla* mbwena kwamba ne “kwikishila mwaba awu, kushààla ànu mwaba awu.” Èyowà, ndi—nditwibwà dyà cisàlù ku màsaamà a mpèkaatù.

121 Mpindyewu, lekèlaayi njikijè mu kwamba kwà dìyi òmwèpelè edi mpindyewu, kumpalà kwà twètù kupita ku mèèsà a Mukalenge. Mashi ne Mubidi wà Mukalenge, bisambakaja ne diitabuujà, mbwena kwamba ne Mashi ne Mubidi, mmùmwa

ne, Nyumà ne Dìyì bisambakaja ne diitabuuja, mmwomùmwe ne Mwoyi wà Cyendèlèlè. “Ewu udi udyà Mubidi Wànyì ne ùnwa Mashi Àànyì ùdi ne Mwoyi wà Cyendèlèlè, ne Mémè nèmubiishè ku lufù ku ditùkù dyà ndekeelu.” Ki bwalu mbwòbù abu. Ncinyì aci? Kòòmunyò wa Mukalenge. Dìyì ne Nyumà, Mwoyi ewu wùdi mu Mashi, Dìyì ne Mashi mmwomùmwe ne Mwoyi wà Cyendèlèlè, ku diitabuuja mu Mukalenge.

¹²² Disambila dyànyì ndyòdi edi, pàndì mmòna ndekeelu wènda ùseemena ne mmòna ne, ku kasunsa kanà kònsò, cintu kampànda ncifwànyine kwenzeka, ne mmanya ne katwèna kule ne Dilwa dyà Mukalenge to:

Mukalenge, dībà adi mu Dìna dyà Mukalenge Yesù, Mwànà wa Nzambi, ndekèlaku ngàngatè Dìyì, Mwelè wà mvità awu, ne ngÙnyùkùshè ne diitabuuja diinè dīndi naadi adi, ne mpengelè njila mu bukòlè bwà démon ne démon yònsò, too ne pàngaàmòna Yesù, ku diyikilangana dyà ku Dìyì Dyèndè.

¹²³ Kuyiikilangana ne Dìyì Dyèndè. “Nwènu bashààle munda Mwànyì, ne Dìyì Dyànyì munda mwènu, dībà adi nùNdòmbè cinwàswà aci ne nebànwènzèlèci.” Bilenga be! Ki kòòmunyò wa cyà bushùwà ne Dìyì ne Nyumà nyèyè awu, pàmwe ne diitabuuja bwà kuCinyùkusha pàmwe ne: “Nùlombè cinùdi baswè, ne nebànwènzèlèci.” Tùsambilàayi.

¹²⁴ Nzambi Taatù wa ngàsà ne Wa ngiikàdilù milenga ne wa Cijila, NDI munène awu, El-Shaddai, bwà Abraham. Éyì Nzambi, mùshindù mwinè wùdi kòòmunyò munène wa Mukalenge ewu mwikàle mwomùmwe ne Mwoyi wa Cyendèlèlè, ne mùshindù wùdiCi cìtwàngana cisàlù ku maditambishi, mùshindù wùdiCi cìtwàngana cisàlù ku bupidyà, mùshindù wùdiCi cìtwàngana cisàlù ku mpèkaatù wa pa buloba! Cidi nkòòmunyò, ne dinanga dyà Nzambi kùdi Taatù wetù wa mu Dyulu. Ne ku bwakànè bwà Yesù Kilistò nkutùdi tupetela mùshindù wà kufika ku mèesà aa. Nènku tudi tulòmba, Mukalenge, bwà Ùpeeshèku yònsò wa kutùdi mùshindù wa kufikakù dilòlò edi, mu Nyumà. Ùtùfwilèku luse. Ne tudi baswè bwà mibidi yètù yà nyumà yìkolè. Katwèna tucyùka byà diya kashàala wa mu èkèleeziyà anyi wa mu dīgumba kampànda abi to. Tudi baswè kwibaka mubidi wa nyumà, bwà kutwìbwa cisàlù ku mpèkaatù, mu mùshindù wà kakùyì kàbidì dijinga dyà kwenza bibi to, ne mwaba wùdi Nyumà Mwìmpè mwà kwangata Dìyì Dyèndè Yèyè mwine ne mishìkù yètù, ne kuDyàmba ne citaleelà ànu mwàkambiibwàDi mu ditùkù adi amu, bwalu Didi Nyumà umwèumwè uvwa munda mwà Mukalenge Yesù awu. Ndi ndòmba, Taatù, bwà Wèwè kutùpèeshakù cyòci aci.

¹²⁵ Mèbà àkaadi àjika. Bwà ne ndìbà kaayi, katwèna bamanyè to, dyàsungidiibwà wa ndekeelu awu. Kàdi ndi ndòmba dilòlò edi, Mukalenge, kwòkò mwaba ewu bàdi kabàyi baKumanyè bu

Musùngidi wabò, swàku bwà bàKupetè dilòòlò edi pàdìbo bàlwa ku màyi a dibàtiiza aa apa, bu civùlukilu, bwà kujikwila mubidi wà beena kwitabuuja ewu ne mbiitàbùùje bwalu abu bwà ne Yesù wa mu Nazàlèetà wàkalediibwa kùdi virgò Màriyà, ne kushipiibwa, kupoopediibwa pa nkùrusè kùdi Ponsiyo Pilaatù, ne wàkabiishiibwa ku lufù mu ditùkù diisàtù kùdi Nzambi, ne mmusòmbe ku dyàbalùmè dyà Mutàmbe Bunène, dilòòlò edi, mwikàle ne mwoyi kashidi bwà kutwàkwila.

¹²⁶ Enzàku, Mukalenge, bwà yèyè muntu umwèumwè, ùtùmikila mikenji yà Bible awu ne: “Nyingàlàlaayi, muntu ne muntu wa kunùdi, nùbatiijiibwè mu Dìna dyà Yesù Kilstò bwà dilekelediibwa dyà mpèkaatù yènù. Bwalu kakwèna dîngà dîna mwinshì mwà Dyulu dipà bantu munùdi ne cyà kusùngidiibwa to.” Éyi Nzambi, swàku bwà bantu bàmonèku meeji matòòkè mu bwalu abu, ne Dìyi didi kadiyi dinyunga adi ne: “Kakwèna dîngà dîna mwinshì mwà Dyulu dipà bantu munùdi ne cyà kusùngidiibwa to, pa kuumusha mu Dìna dyà Yesù Kilstò.” Ki bwà cinyi, mùpostòlò awu wàkamba ne: “Nyingàlàlaayi, muntu ne muntu wa kunùdi ne nùbatiijiibwè mu Dìna dyà Yesù Kilstò bwà dilekelediibwa dyà mpèkaatù, nènku nenùpetè kupà kwà Nyumà Mwîmpè. Bwalu mulayi wùdi bwà cikondo ne cikondo cyònsò, mu búngi bwònsò bwàbìkilàbo kùdi Mukalenge Nzambi wetù abu.” Enzàku, Mukalenge, bwà kwikalè dibìikila dyàbúngi dilòòlò edi.

¹²⁷ Ne mbambè kàbìdi, kùdi Mukalenge wetù ne: “Muntu nànsha umwe kèna mwà kulwa kùNdi pàdi Taatù Wanyì kàyi mumukòke to, ne bònsò bàdi Taatù muMpèeshe nebàlwe kùNdi. Mikòòkò Yànyi yidi yùmvwa Dìyi Dyànyi.” Mwenyi, ne mwenyi yèyè mwakùle, dìyi didi kadiyi dyà mu Mifundu, ne lùkàsà lwònsò mùkòòkò newùjìngùlùlè. Éyi Nzambi! Kàdi pìikalàbi ne n’Dìyi Dyèbè, Bible, cìdiDi dyàmba aci, mùkòòkò wònsò newùDitèelèjè, bwalu Didi Cyàkudyà cyà mikòòkò. Bàkàadi bayiikilàngàna. Mbamanyè ne n’Cyàkudyà cyà mùshindù kaayi cìdi Taatù ùdiishangana naaci. “Muntu kàakwikala ne mwoyi ànu ku dyàmpà nkààyaadi to, kàdi ku Dìyi dyònsò didi dipàtukà mukana mwà Nzambi.” Enzàku, Mukalenge, bwà bààbúngi bàmonè ne bùmvwè, ne bàlwe Kùdi dilòòlò edi.

¹²⁸ Aba bàdi kabàyi ne Nyumà Mwîmpè abu, swàku bwà kabàcìlàadikijikù bàpicisha díbà dikwàbò dijimà to. Díbà didi mwà kwikala dimanè kupita paanyimà pàà díbà dimwè. Bàdi mwà kwikala kabàyi apa to.

¹²⁹ Nènku, Taatù, bu mutùdi badisangishe mpindyewu banyùngùlùkile mèèsà bwà kwangata cimfwànyi eci cyà mubidi Wèbè mucibula, tudi tulòmba ne kwòkò kwikalè mpèkaatù munkaci mwètù, Mukalenge, tufwilèku luse. Wèwè udi mwambè ne: “Panùdi nudisangisha, nwindilanganè.” Nzambi, kwòkò kwikalè mpèkaatù mu disangisha edi, mwaba kanà wònsò, ndi ndòmba bwà Mashi a Yesù Kilstò àtapululèku mulùme awu

ne mpèkaatù wendè, anyi mukàji awu, mwànà wa balùme anyi wa bakàji. Nènku, Taatù, ndi ndòmba bwànyi mèmè mwìnè ne, Wèwè ùntàpùlùlèku ne mpatà yònsò, mpèkaatù yònsò, bupidyà bwònsò, cintu kanà cyònsò cidi. . . Tudi bamanyè ne bupidyà mmpèkaatù. Ki mpèkaatù umwèpelè udikù. “Ewu udi kàyi wítabuujà mmumanè kupiishibwa.” Ne mpèkaatù umwèpelè udikù, nkubènga kwitabuujà Dìyì dyà Nzambi. Nènku, Taatù, kwòkò bupidyà kampànda munda mwànyi emu, mfwilèku luse, Èyì Nzambi, bùdikù búngì cyanààna, ne ndi ndòmba bwà Ùmfwilèku luse. Fwilakù disangisha dyànyi dy’Údi mumpèèshe dilòòlò edi luse, ne bàdiishèku ne Dìyì. Enzàku nàнку.

¹³⁰ Ne patùdì twangata tuntu tukesè etu twà civùlukilu cyà mubidi mucibula wà Ewu Udi mubiishibwe ku bafwè ne mwikàle ne mwoyi kashidi ne kashidi munkaci mwètù, swàku bwà twàkidilè kòomunyò wa kùdiYe, Mukalenge, diyikilangana dyà kùdi Nyumà Mwimpè. Enzàku nàнку, Taatù. Tudi tulòmba mu Dìnà dyà Yesù. Amen.

¹³¹ Mpindyewu, bwènù nwènù bàdi ne cyà kuya ne kanùyì mwà kushààla bwà mudimu wà mèèsà a Mukalenge bwà tusunsa tutwè ku dikùmi ne tùtaanu. . . Katwèna bààbùngì to, nènku netwàngatè mèèsà a Mukalenge. Kì mmèèsà a Mukalenge a kaàyi a bantu bònsò nànsa. Kakùyì mpatà to ngàà mwena kwitabuujà mwena Kilistò yònsò. Nzambi kàtu ne mukàlù mwela pankaci pàà ba-Baptistes ne ba-Méthodistes, ne bakwàbò to. Tudi bònsò, ku Nyumà umwe, babàtùjijibwe mu Mubidi wùmwe, ne tudi beena mwàbò bàà Bukalenge bwà Nzambi. Nènku kwòkò muntu kampànda udi mwenyi munkaci mwètù, mèmè ncitu ntàmba kwikala apa to, ne ncitu mumanyè ne nganyì udi cidimba ne nganyì udi kàyi cidimba to. Vùlukàayi ne, nànsa wèwè mwikàle wa mu Èkèleeziyà kaayi, aci kaciyèna ne bwalu to. Byòbì biinè, kùdi Èkèleeziyà ànu umwèpelè, ne kwèna ukàshààla wa Mwòmò to, udi ulediibwaMù. Ncyà bushùwà. Nènku udi ulediibwa mu Èkèleeziyà wa Nzambi ewu. Nènku tudi tulòmba bwà wèwè kwakidila Kilistò dilòòlò edi, kuyikilangana Nendè patùdì tuvùluka mubidi Wèndè mucibula apa, ne tuubintu tukesè tutùdì twangata, twà paasàkà etu, ne Nzambi àtùmymàine Mashi mu myoyi yètù ne mu kondò kàà mwoyi.

¹³² Mpindyewu nebàlwè ne kòomunyò, nènku netùbalè mpindyewu mu Kolintò wa Kumpàla, nshapità wa 12. Nènku netwikalè mwà kudyà mèèsà a Mukalenge dyàkàmwè paanyimà pàà cyòci eci, ne tudi batwishibwe ne Nzambi neànùbènèshè byà biyiila ne panshì. Ne patùdì ànu ne twàbadi cyòci eci, anyi kumpàlà kwà twètù kucibala, piikalàbi bikèngela bwà nwènù kuya, èè, nudì mwà kupàtuka cimùmà. Nènku pashiishe kwikala neetù cyàkàbìdì mu diisàtù dilòòlò, ne mu dyàlumingu mu dindà ne mu dyàlumingu dilòòlò. Bu nwènù mwa kushààla bwà kudyà neetù mèèsà a Mukalenge, netwikalè ne disànkà dyàbùngì bwà nwènù kucyènza. Pashiishe dyàkàmwè paanyimà pàà cyòci

aci, nekwikalè Mukalenge. . . nekwikalè mudimu wà dibàtiiza, wikalà mu tusunsa tutwè ku dikùmi ne tutaanu, anyi makùmi àbìdì bwà twòtò twàbùngì, mùndì ncinka. Kolintò wa Kumpàla, nshapità wa 11, mvensà wa 23.

. . . Ndi mupetè kùdì Mukalenge cìndì pàànyì munùtwàdìle ne: Mukalenge Yesù mu bufùkù bùmwebùmwebè . . . bwàkamutungilàbo abu wàkangata dyàmpà,

Ne pààkamanàye kwamba disàkidila, wàkadìcìbula, . . . kwambayè ne: Angàtaayi, ne nùdye: eci mmubidì wànyì, wùdì mucìbùdìbwe bwà bwalu bwènù: nwìkalàayi nwenza nùнку bwà kumvùluka.

Byà mwomùmwebè kàbìdì paanyimà yéyè wàkangata lupànza, ne pààkamanàye kudyà didyà dyà dilòòlò, wàkamba ne: Eci ndupànza lwà cipungidì cipyacìpyà mu mashi àànyì: nwìkalàayi nwenza nùнку, misangu yònsò yinwàlùnwà, bwà kumvùluka.

Bwalu misangu yònsò yinwàdyà dyàmpà edì, ne yinwànwà lupànza elu, nudi nuleeja paatòòke lufù lwà Mukalenge too ne pààlwàye.

Ki bwà cinyì ewu yònsò wabènga kudyà eci. . . ewu yònsò wàdyà dyàmpà edì, ne wànwà lupànza lwà Mukalenge elu, kàyi mubikumbànyine to, neikalè mupùile ku mubidì ne mashi byà Mukalenge.

Kàdi muntu àdìkenkètè yéyè mwinè, ne pa nàнку àdye dyàmpà adì, ne ànwè lupànza alu.

Bwalu ewu udi udyà ne ùnwà kàyi mubikumbànyine to, ùdì ùdya ne ùnwà dipùila bwèndè yéyè mwinè, kàyi ùjingulula mubidì wà Mukalenge to.

Bwà bwalu ebu bààbùngì bàdì bàsaama ne bìikàle ne butekètè munkacì mwènù, . . . bààbùngì mbalààle tulù.

Bwalu bu twètù mwà kudìlumbulwisha twètù nkààyeetù, katùwà ne cyà kulumbulwishiibwa to.

Kadi patùdì tulumbulwishiibwa, tudi tunyookiibwa kùdì Mukalenge, bwà katùlu kupùishiibwa pàmwebè ne bàà pa buloba nànsa.

Ki bwà cinyì, bânà bèètù, panùdì nudìsangisha bwà kudyà, indìlàngànaayi muntu ne mukwèndè.

¹³³ Mpindyewu, ànu katanci kakesè cyanààna kàà disambila dyà cimùmà bwà muntu ne muntu wa kutùdì, nùnsambidìlaayi pàndì mèmè nnùsambidìla apa. [Mwanèètù Branham ùdì ùsambila bitekètèbitekètè—Muf.] . . . ? . . .

Andàmùnàku ku malòmba aa, Nzambì wa Bukolè bwònsò. Tùfwilèku luse ku matomboka ètù mutùtù twètù pèètù tufwila

aba bàtù bàtwènzèlà matomboka luse. Tudi tulòmba nùnkù mu Dìná dyà Yesù Kilistò. Amen.

¹³⁴ Tupese tukesè etu twà dyàmpà dyà kosher didi dyenza kadiyi ne màfutà, mukèlè, ne bikwàbò edi, didi dilleeja mubidi wà Mukalenge. Kí ndyà cijèngù nànsha, ndicibula dyònsò tupese tupese. Mbwalu didi dyùmvwija mubidi Wèndè wàkacibudiibwà bwà bwalu bwètù awu. Nènku Nzambì àfilèku mabènesha Èndè kùdì muntu yònsò udi uwùdya awu. Mpindyewu, kí ngwòwò mubidi awu to, cidi cilleeja ànu mubidi awu cyanààna. Mémè ncyèna ne bukòlè to, muntu mukwàbò nànsha umwe kèna naabù to, bwà kucìvwija cintu cishìllàngàna ne dyàmpà. Nzambì nkààyèndè. Nènku cyôci aci ki cyàkatwàmbilàYe, bwà twètù kudyà dyàmpà edi ne kunwà lupànzà lwà mvinyò elu. Mpindyewu twinyikààyaaku mitù yètù.

¹³⁵ Nzambì Mutàmbe Cijila, utùdì twètù basadidi Bèndè, mu Dìná dyà Yesù Kilistò, jidìlaku dyàmpà edi bwà mudimu wùdìdi dyenzela, bwà ne, patùdì tudyàkidila apa, ditùvùlwijèku ne Mukalenge wetù wàkapoopediibwa pa nkùrusè; ne mubidi Wèndè, wà musinga mukòlè ne wà cijila mùvwàwu amu, wùvwa musambakaja ne mibùndàbùndà ne mēbà ne misonso, bwètù twètù, bwà ku mubidi Wèndè wùdì mupanda awu kulwilakù Nyumà udi utùpèèsha Mwoyi wà Cyendèlèlèlè awu. Swàku bwà twètù, Mukalenge, patùdì tudyà cyôci eci apa, tùpetè ngàsà wa dyenza nendè lwendu, mwàkenzà Izàlèlèlè munda mwà bidimu makùmi ànaayi mu cipèèlà, ne kakùyi muntu wa butekète nànsha umwe munkaci mwàbò to. Taatù Nzambì, enzàku nànkù, patùdì tuKulòmba bwà kujidila dyàmpà edi apa, dyàmpà dyà kòsher edi, bwà mudimu wùdìdi dyenzela. Mu Dìná dyà Yesù. Amen.

¹³⁶ Lupànzà lwà Dipungila Dipyadiyà, Mashi. Ndi mvùluka musambu awu ne:

Kubangila ànu pàngààkàmonà ku diitabuuja
musùlù awu
Wùdì mpùtà Yèbè yidi yizòloloka ayi yitwàla,
Dinanga dipikudi ki dikaadi cyànyì cyena-
bwalu,
Ne nedìikalè nànkù too ne pàngààfwà.

¹³⁷ Pàndì mémè mmòna mashi aa, tumuma twà mvinyò, mashi a tumuma twà mvinyò aa, ndi mumanyè ne cidi cilleeja Mashi àkapàtukà mu mubidi wà Mukalenge Yesù. Swàku bwà ewu yònsò udi wakidila cyôci eci awu àpetè Mwoyi wà Cyendèlèlèlè, mabèèdì àpatukè mu mibidi yàbò, swàku bwà dicyòkakana ne mateketa, dicìncimikiibwa, swàku bwà dyabùlù (mu mmwènekèlu yònsò) àbàshiyè, bwà bààmòna mwà kwikala ne dikàndà dinène ne bukòlè bwà mubidi ne Mwoyi wa Cyendèlèlèlè, bwà kulekelabò bukènkè bwàbò kukenkesha

kumpàlà kwà lukòngò lwà beena lwonji ne beena masandi lutùdimu ne mwoyi elu, bwà kutùmbishabò Nzambi.

¹³⁸ Taatù wa mu Dyulu, nyewù tuKuleeja mamuma a mucì wà mvinyò. Mu Dìná dyà Yesù Kilistò, bìjidilèku, bwà kuleejabi Mashi a Mwan'Èbè, Yesù, mu Ówò mmutùdì ne: “Mutàpiibwe mpùtà bwà dishipa dyètù dyà mikenji, ku mibùndàbùndà Yèndè twàkondopiibwa.” Enzàku, Mukalenge, bwà Mwoyi awu wùlwe kutùdì, Mwoyi wà Cyendèlèlè wà wùyiila ne panshì awu, bwà twamòna mwà kuKukwàcila mudimu bilenga menemene, kwikalakù ne dikàndà ne bukolè bwà mubidi bwà kuya neetù ku mwaba ne ku mwaba kutùdì tutèkemena ne netùKusadilè, kwònsò kuWàsàwà kutùbikila aku. Fìlakù mabènesha aa, mu Dìná dyà Yesù, mmutùdì tulòmba emu. Amen.



MÈÈSÀ À MUKALENGE LUA62-0204
(Communion)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dilòlò, mu matùkù à4 a ngondo mwibìdì, cidimu cyà 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org